

四庫全書

史部

欽定四庫全書

繹史卷一百十二上

靈壁縣知縣馬驥撰

列莊之學上

劉向別錄列子者鄭人也與鄭繆公同時蓋有道者也

其學本於黃帝老子號曰道家

○宜為編公漢書道家列子八篇名御寇

列子

天瑞

子列子居鄭圃四十年人無識者國君卿大夫

眎之猶衆庶也國不足將嫁於衛弟子曰先生往無反期弟子敢有所謁先生將何以教先生不聞壺丘子林

之言乎子列子笑曰壺子何言哉雖然夫子嘗語伯昏  
瞽人吾側聞之試以告女其言曰有生不生有化不化  
不生者能生生不化者能化化生者不能不生化者不  
能不化故常生常化常生常化者無時不生無時不化  
陰陽爾四時爾不生者疑獨不化者往復往復其際不  
可終疑獨其道不可窮黃帝書曰谷神不死是謂玄牝  
玄牝之門是謂天地之根繇繇若存用之不勤故生物  
者不生化物者不化自生自化自形自色自智自力自

消自息謂之生化形色智力消息者非也 子列子曰  
天地無全功聖人無全能萬物無全用故天職生覆地  
職形載聖職教化物職所宜然則天有所短地有所長  
聖有所否物有所通何則生覆者不能形載形載者不  
能教化教化者不能達所宜宜定者不出所位故天地  
之道非陰則陽聖人之教非仁則義萬物之宜非柔則  
剛此皆隨所宜而不能出所位者也故有生者有生生  
者有形者有形形者有聲者有聲聲者有色者有色色



者有味者有味味者生之所生者死矣而生生者未嘗  
終形之所形者實矣而形形者未嘗有聲之所聲者聞  
矣而聲聲者未嘗發色之所色者彰矣而色色者未嘗  
顯味之所味者嘗矣而味味者未嘗呈皆無為之職也  
能陰能陽能柔能剛能短能長能圓能方能生能死能  
暑能涼能浮能沈能宮能商能出能沒能玄能黃能甘  
能苦能羶能香無知也無能也而無不知也而無不能  
也子列子適衛食於道從者見百歲髑髏攬蓬而指

顧謂弟子百豐曰唯予與彼知而未嘗生未嘗死也此過養乎此過歡乎種有幾若蠅為鶉得水為鼃得水土之際則為蠅蟻之衣生於陵屯則為陵烏陵烏得鬱栖則為烏足烏足之根為蟻螯其葉為胡蝶胡蝶胥也化而為蟲生竈下其狀若脫其名曰駒掇駒掇千日化而為鳥其名曰乾餘骨乾餘骨之沫為斯彌斯彌為食醯頤輅食醯頤輅生乎食醯黃輅食醯黃輅生乎九猷九猷生乎簪芮生乎腐蠹羊肝化為地皋馬血之為

轉燐也人血之為野火也鷄之為鷄鷄之為布穀布穀  
久復為鷄也燕之為蛤也田鼠之為鴉也朽瓜之為魚  
也老非之為覓也老嫗之為媛也魚卵之為蠱宣爰之  
獸自孕而生曰類河澤之鳥視而生曰鷁純雌其名大  
腰純雄其名穉蜂思士不妻而感恩女不夫而孕后稷  
生乎巨跡伊尹生乎空桑厥昭生乎濕醢雞生乎酒羊  
奚比乎不苟久竹生青寧青寧生程程生馬馬生人人  
久入于機萬物皆出于機皆入于機 杞國有人憂天

地崩墜身亡所寄廢寢食者又有憂彼之所憂者因往  
曉之曰天積氣耳亡處亡氣若屈伸呼吸終日在天中  
行止奈何憂崩墜乎其人曰天果積氣日月星宿不當  
墜邪曉之者曰日月星宿亦積氣中之有光耀者只使  
墜亦不能有所中傷其人曰奈地壞何曉者曰地積塊  
耳充塞四虛亡處亡塊若躇步跼蹐終日在地上行止  
奈何憂其壞其人舍然大喜曉之者亦舍然大喜長廬  
子聞而笑之曰虹蜺也雲霧也風雨也四時也此積氣

之成乎天者也山嶽也河海也金石也火木也此積形之成乎地者也知積氣也知積塊也奚謂不壞夫天地空中之一細物有中之最巨者難終難窮此固然矣難測難識此固然矣憂其壞者誠為大遠言其不壞者亦為未是天地不得不壞則會歸于壞過其壞時奚為不憂哉子列子聞而笑曰言天地壞者亦謬言天地不壞者亦謬壞與不壞吾所不能知也雖然彼一也此一也故生不知死死不知生來不知去去不知來壞與不壞

吾何容心哉 齊之國氏大富宋之向氏大貧自宋之  
齊請其術國氏告之曰吾善為盜始吾為盜也一年而  
給二年而足三年大穰自此以往施及州閭向氏大喜  
喻其為盜之言而不喻其為盜之道遂踰垣鑿室手目  
所及亡不探也未及時以賊獲罪沒其先居之財向氏  
以國氏之謬已也往而怨之國氏曰若為盜若何向氏  
言其狀國氏曰嘻若失為盜之道至乎此今將告若矣  
吾聞天有時地有利吾盜天地之時利雲雨之滂潤山

澤之產育以生吾禾植吾稼築吾垣建吾舍陸盜禽獸  
水盜魚鼈亡非盜也夫禾稼土木禽獸魚鼈皆天之所  
生豈吾之所有然吾盜天而亡歟夫金玉珍寶穀帛財  
貨人之所聚豈天之所與若盜之而獲罪孰怨哉向氏  
大惑以為國氏之重罔已也過東郭先生問焉東郭先  
生曰若一身庸非盜乎盜陰陽之和以成若生載若形  
況外物而非盜哉誠然天地萬物不相離也認而有之  
皆惑也國氏之盜公道也故亡歟若之盜私心也故得

罪有公私者亦盜也亡公私者亦盜也公公私私天地之德知天地之德者孰為盜邪孰為不盜邪

黃帝列子

師老商氏友伯高子進二子之道乘風而歸尹生聞之從列子居數月不省舍因閒請斬其術者十反而十不告尹生懟而請辭列子又不命尹生退數月意不已又往從之列子曰汝何去來之頻尹生曰曩章戴有請於子子不我告固有感於子今復脫然是以又來列子曰曩吾以汝為達今汝之鄙至此乎姬將告汝所學於夫



子者矣自吾之事夫子友若人也三年之後心不敢念是非口不敢言利害始得夫子一眄而已五年之後心庚念是非口庚言利害夫子始一解顏而笑七年之後從心之所念庚無是非從口之所言庚無利害夫子始一引吾竝席而坐九年之後橫心之所念橫口之所言亦不知我之是非利害歟亦不知彼之是非利害歟亦不知夫子之為我師若人之為我友內外進矣而後眼如耳耳如鼻鼻如口無不同也心凝形釋骨肉都融不

覺形之所倚足之所履隨風東西猶木葉榦殼竟不知  
風乘我邪我乘風乎今汝居先生之門曾未決時而懟  
憾者再三汝之片體將氣所不受汝之一節將地所不  
載履虛乘風其可幾乎尹生甚忤屏息良久不敢復言

述異記列禦寇鄭人御風而行常以立春日歸乎八荒  
立秋日遊於風穴是風至即草木皆生去則草木皆落  
謂之離  
合風  
列禦寇為伯昏無人射引之盈貫措杯水其

肘上發之鏑矢復沓方矢復寓當是時也猶象人也伯  
昏無人曰是射之射非不射之射也當與汝登高山履

危石臨百仞之淵若能射乎於是無人遂登高山履危  
石臨百仞之淵背逡巡足二分垂在外揖禦寇而進之  
禦寇伏地汗流至踵伯昏無人曰夫至人者上闚青天  
下潛黃泉揮斥八極神氣不變今汝怵然有恟目之志  
爾於中也殆矣夫 有神巫自齊來處於鄭命曰季咸  
知人死生存亡禍福壽夭期以歲月旬日如神鄭人見  
之皆避而走列子見之而心醉而歸以告壺丘子曰始  
吾以夫子之道為至矣則又有至焉者矣壺子曰吾與

汝既其文未既其實而固得道歟衆雌而無雄而又奚  
卵焉而以道與世抗必信矣夫故使人得而相汝嘗試  
與來以予示之明日列子與之見壺子出而謂列子曰  
嘻子之先生死矣弗活矣不可以旬數矣吾見怪焉見  
濕灰焉列子入涕泣沾衾以告壺子壺子曰向吾示之  
以地文罪乎不誼不止是殆見吾杜德幾也嘗又與來  
明日又與之見壺子出而謂列子曰幸矣子之先生遇  
我也有廖矣灰然有生矣吾見杜權矣列子入告壺子

壺子曰向吾示之以天壤名實不入而機發於踵此為  
杜權是殆見吾善者幾也嘗又與來明日又與之見壺  
子出而謂列子曰子之先生坐不齊吾無得而相焉試  
齊將且復相之列子入告壺子壺子曰向吾示之以太  
沖莫朕是殆見吾衡氣幾也鯁旋之潘為淵止水之潘  
為淵流水之潘為淵濫水之潘為淵沃水之潘為淵汙  
水之潘為淵雍水之潘為淵汙水之潘為淵肥水之潘  
為淵是為九淵焉嘗又與來明日又與之見壺子立未

定自失而走壺子曰追之列子追之而不及反以報壺  
子曰已滅矣已失矣吾不及也壺子曰向吾示之以未  
始出吾宗吾與之虛而猗移不知其誰何因以為茅靡  
因以為波流故逃也然後列子自以為未始學而歸三  
年不出為其妻爨食狶如食人於事無親雕琢復朴塊  
然獨以其形立怵然而封戎壹以是終 子列子之齊  
中道而反遇伯昏瞀人伯昏瞀人曰奚方而反曰吾驚  
焉惡乎驚吾食於十漿而五漿先饋伯昏瞀人曰若是

則汝何為驚已曰夫內誠不解形謀成光以外鎮人心使人輕乎貴老而整其所患夫漿人特為食羹之貨無多餘之贏其為利也薄其為權也輕而猶若是而況萬乘之主身勞於國而智盡於事彼將任我以事而效我以功吾是以驚伯昏瞀人曰善哉觀乎汝處已人將保汝矣無幾何而往則戶外之屨滿矣伯昏瞀人北面而立敦杖蹙之乎頤立有間不言而出賓者以告列子列子提履徒跣而走暨乎門問曰先生既來曾不廢藥乎

曰已矣吾固告汝曰人將保汝果保汝矣非汝能使人  
保汝而汝不能使人無汝保也而焉用之感也感豫出  
異且必有感也操而本身又無謂也與汝遊者莫汝告  
也彼所小言盡人毒也莫覺莫悟何相孰也 狀不必  
童而智童智不必童而狀童聖人取童智而遺童狀衆  
人近童狀而疏童智狀與我童者近而愛之狀與我異  
者疏而畏之有七尺之骸手足之異戴髮含齒倚而趣  
者謂之人而人未必無獸心雖有獸心以狀而見親矣



傅翼戴角分牙布爪仰飛伏走謂之禽獸而禽獸未必  
無人心雖有人心以狀而見疏矣庖犧氏女媧氏神農  
氏夏后氏蛇身人面牛首虎鼻此有非人之狀而有大  
聖之德夏桀殷紂魯桓楚穆狀貌七竅皆同于人而有  
禽獸之心而衆人守一狀以求至智未可幾也黃帝與  
炎帝戰于阪泉之野帥熊羆狼豹羆虎為前驅鵠鵠鷹  
鳶為旗幟此以力使禽獸者也堯使夔典樂擊石拊石  
百獸率舞蕭韶九成鳳皇來儀此以聲致禽獸者也然

則禽獸之心奚為異人形音與人異而不知接之道  
爾聖人無所不知無所不通故得引而使之焉禽獸之  
智有自然與人童者其齊欲攝生亦不假智于人也牝  
牡相偶母子相親避平依險違寒就溫居則有羣行則  
有列小者居內壯者居外飲則相攜食則鳴羣太古之  
時則與人同處與人並行帝王之時始驚駭散亂矣逮  
于末世隱伏逃竄以避患害今東方介氏之國其國人  
數數解六畜之語者蓋偏知之所得太古神聖之人備

知萬物情態悉解異類音聲會而聚之訓而受之同于  
人民故先會鬼神魑魅次達八方人民未聚禽獸蟲蛾  
言血氣之類心智不殊遠也神聖知其如此故其所教  
訓者無所遺逸焉

周穆王

子列子曰善為化者其道密

庸其功同人五帝之德三王之功未必盡智勇之力或  
由化而成熟測之哉覺有八徵夢有六候奚謂八徵一  
曰故二曰為三曰得四曰喪五曰哀六曰樂七曰生八  
曰死此八徵者形所接也奚謂六候一曰正夢二曰噩

夢三曰思夢四曰寤夢五曰喜夢六曰懼夢此六者神  
所交也不識感變之所起者事至則感其所由然識感  
變之所起者事至則知其所由然知其所由然則無所  
怛一體之盈虛消息皆通於天地應於物類故陰氣壯  
則夢涉大水而恐懼陽氣壯則夢涉大火而燔燭陰陽  
俱壯則夢生殺甚飽則夢與甚饑則夢取是以以浮虛  
為疾者則夢揚以沈實為疾者則夢溺藉帶而寢則夢  
蛇飛鳥銜髮則夢飛將陰夢火將疾夢食飲酒者憂歌

舞者哭子列子曰神遇為夢形接為事故晝想夜夢神形所遇故神凝者夢想自消信覺不語信夢不達物化之往來者也古之真人其覺自忘其寢不夢幾虛語哉西極之南隅有國焉不知境界之所接名古莽之國陰陽之氣所不交故寒暑亡辨日月之光所不照故晝夜亡辨其民不食不衣而多眠五旬一覺以夢中所為者實覺之所見者妄四海之齊謂中央之國跨河南北越岱東西萬有餘里其陰陽之審度故一寒一暑昏明之

分察故一晝一夜其民有智有愚萬物滋殖才藝多方  
有君臣相臨禮法相持其所云為不可稱計一覺一寐  
以為覺之所為者實夢之所見者妄東極之北隅有國  
曰阜落之國其土氣常燠日月餘光之照其土不生嘉  
苗其民食草根木實不知火食性剛悍彊弱相藉貴勝  
而不尚義多馳步少休息常覺而不眠 周之尹氏大  
治產其下趣役者侵晨昏而弗息有老役夫筋力竭矣  
而使之彌勤晝則呻呼而即事夜則昏憊而熟寐精神

荒散昔昔夢為國君居人民之上總一國之事遊燕宮  
觀恣意所欲其樂無比覺則復役人有慰諭其勤者役  
夫曰人生百年晝夜各分吾晝為僕虜苦則苦矣夜為  
人君其樂無比何所怨哉尹氏心營世事慮鍾家業心  
形俱疲夜亦昏憊而寐昔昔夢為人僕趨走作役無不  
為也數罵杖撻無不至也眠中呻吟呻呼徹旦息焉尹  
氏病之以訪其友友曰若位足榮身資財有餘勝人遠  
矣夜夢為僕苦逸之復數之常也若欲覺夢兼之豈可

得邪尹氏聞其友言寬其後夫之程減已思慮之事疾  
竝少間鄭人有薪于野者遇駭鹿御而擊之斃之恐  
人見之也遽而藏諸隍中覆之以蕉不勝其喜俄而遺  
其所藏之處遂以為夢焉順途而詠其事傍人有聞者  
用其言而取之既歸告其室人曰向薪者夢得鹿而不  
知其處吾今得之彼直真夢者矣室人曰若將是夢見  
薪者之得鹿邪詎有薪者邪今真得鹿是若之夢真邪  
夫曰吾據得鹿何用知彼夢我夢邪薪者之歸不厭失



鹿其夜真夢藏之之處又夢得之之主爽旦案所夢而尋得之遂訟而爭之歸之士師士師曰若初真得鹿妄謂之夢真夢得鹿妄謂之實彼真取若鹿而與若爭鹿室人又謂夢認人鹿無人得鹿今據有此鹿請二分之一聞鄭君鄭君曰嘻士師將復夢分人鹿乎訪之國相國相曰夢與不夢臣所不能辨也欲辨覺夢唯黃帝孔丘今亡黃帝孔丘孰辨之哉且恂士師之言可也 宋陽里華子中年病忘朝取而夕忘夕與而朝忘在塗則

忘行在室則忘坐。今不識先後不識今闔室毒之謁史而卜之弗占謁巫而禱之弗禁謁醫而攻之弗已。魯有儒生自媒能治之。華子之妻子以居產之半請其方。儒生曰：此固非卦兆之所占，非祈請之所禱，非藥石之所攻。吾試化其心，變其慮，庶幾其瘳乎！於是試露之而求衣，饑之而求食，幽之而求明。儒生欣然告其子曰：疾可已也。然吾之方密傳世，不以告人。試屏左右，獨與居室七日，從之。莫知其所施為也。而積年之疾一朝都除。華

子既悟迺大怒黜妻罰子操戈逐儒生宋人執而問其  
以華子曰曩吾忘也蕩蕩然不覺天地之有無今頓識  
既往數十年來存亡得失哀樂好惡擾擾萬緒起矣吾  
恐將來之存亡得失哀樂好惡之亂吾心如此也須臾  
之忘可復得乎子貢聞而怪之以告孔子孔子曰此非  
汝所及乎顧謂顏回紀之 燕人生於燕長於楚及老  
而還本國過晉國同行者誑之指城曰此燕國之城其  
人愀然變容指社曰此若里之社乃喟然而歎指舍曰

此若先人之廬乃涓然而泣指隴曰此若先人之冢其人哭不自禁同行者啞然大笑曰予昔給若此晉國耳其人大慙及至燕真見燕國之城社真見先人之廬冢

悲心更微

仲尼

子列子既師壺丘子林友伯昏瞽人乃

居南郭從之處者日數而不及雖然子列子亦微焉朝朝相與辨無不聞而與南郭子連牆二十年不相謁請相遇于道目若不相見者門之徒役以為子列子與南郭子有敵不疑有自楚來者問子列子曰先生與南郭

子奚敵子列子曰南郭子貌充心虛耳無聞目無見口  
無言心無知形無惕往將奚為雖然試與汝偕往閱第  
子四十人同行見南郭子果若欺魄焉而不可與接顧  
視子列子形神不相偶而不可與羣南郭子俄而指子  
列子之弟子末行者與言衍衍然若專直而在雄者子  
列子之徒駭之反舍咸有疑色子列子曰得意者無言  
進知者亦無言用無言為言亦言無知為知亦知無言  
與不言無知與不知亦言亦知亦無所不言亦無所不

知亦無所言亦無所知如斯而已汝奚妄駭哉 初子

列子好遊壺丘子曰禦寇好遊遊何所好列子曰遊之  
樂所玩無故人之遊也觀其所見我之遊也觀其所變  
遊乎遊乎未有能辨其遊者壺丘子曰禦寇之遊固與  
人同歟而曰固與人異歟凡所見亦恒見其變玩彼物  
之無故不知我亦無故務外遊不知務內觀外遊者求  
備于物內觀者取足于身取足于身遊之至也求備于  
物遊之不至也於是列子終身不出自以為不知遊壺

丘子曰遊其至乎至遊者不知所適至觀者不知所眡  
物物皆遊矣物物皆觀矣是我之所謂遊是我之所謂  
觀也故曰遊其至矣乎遊其至矣乎無所由而常生  
者道也由生而生故雖終而不亡常也由生而亡不幸  
也有所由而常死者亦道也由死而死故雖未終而自  
亡者亦常也由死而生幸也故無用而生謂之道用道  
得終謂之常有所用而死者亦謂之道用道而得死者  
亦謂之常季梁之死楊朱望其門而歌隨梧之死楊朱

撫其尸而哭隸人之生隸人之死衆人且歌衆人且哭  
目將眇者先睹秋毫耳將聾者先聞蚋飛口將爽者先  
辨淄澠鼻將窒者先覺焦朽體將僵者先亟犇佚心將  
迷者先識是非故物不至者則不反

湯問

殷湯問於夏

革曰古初有物乎夏革曰古初無物今惡得物後之人  
將謂今之無物可乎殷湯曰然則物無先後乎夏革曰  
物之終始初無極已始或為終終或為始惡知其紀然  
自物之外自事之先朕所不知也殷湯曰然則上下八



方有極盡乎革曰不知也湯固問革曰無則無極有則有盡朕何以知之然無極之外復無無極無盡之中復無無盡無極復無無極無盡復無無盡朕以是知其無極無盡也而不知其有極有盡也湯又問曰四海之外奚有革曰猶齊州也湯曰汝奚以實之革曰朕東行至營人民猶是也問營之東復猶營也西行至幽人民猶是也問幽之西復猶幽也朕以是知四海四荒四極之不異是也故大小相含無窮極也含萬物者亦如含天

地含萬物也故不窮含天地也故無極朕亦焉知天地之表不有大天地者乎亦吾所不知也然則天地亦物也物有不足故昔者女媧氏鍊五色石以補其闕斷鼇之足以立四極其後共工氏與顓頊爭為帝怒而觸不周之山折天柱絕地維故天傾西北日月星辰就焉地不滿東南故百川水潦歸焉湯又問物有巨細乎有修短乎有同異乎革曰渤海之東不知幾億萬里有大壑焉實惟無底之谷其下無底名曰歸墟八紘九野之水

天漢之流莫不注之而無增無減焉其中有五山焉一曰岱輿二曰員嶠三曰方壺四曰瀛洲五曰蓬萊其山高下周旋三萬里其頂平處九千里山之中間相去七萬里以為鄰居焉其上臺觀皆金玉其上禽獸皆純縞珠玕之樹皆叢生華實皆有滋味食之皆不老不死所居之人皆仙聖之種一日一夕飛相往来者不可數焉而五山之根無所連著常隨潮波上下往還不得暫時焉仙聖毒之訴之於帝帝恐流於西極失羣聖之居乃

命禺彊使巨鼇十五舉首而戴之迭為三番六萬歲一  
交焉五山始峙而龍伯之國有大人舉足不盈數步而  
暨五山之所一釣而連六鼇合負而趣歸其國灼其骨  
以數焉於是岱輿員嶠二山流於北極沈於大海仙聖  
之播遷者巨億計帝憑怒侵滅龍伯之國使阨侵小龍  
伯之民使短至伏羲神農時其國人猶數十丈從中州  
以東四十萬里得僬僥國人長一尺五寸東北極有人  
名曰詵人長九尺荆之南有冥靈者以五百歲為春五

百歲為秋上古有大椿者以八千歲為春八千歲為秋  
朽壤之上有菌芝者生於朝死於晦春夏之月有蠓蚋  
者因雨而生見陽而死終髮北之北有溟海者天池也  
有魚焉其廣數千里其長稱焉其名為鯨有鳥焉其名  
為鵬翼若垂天之雲其體稱焉世豈知有此物哉大禹  
行而見之伯益知而名之夷堅聞而志之江浦之間生  
麼蟲其名曰焦螟羣飛而集於蚊睫弗相觸也栖宿去  
來蚊弗覺也離朱子羽方晝拭眚揚眉而望之弗見其

形觥俞師曠方夜耳俛首而聽之弗聞其聲唯黃帝與  
容成子居空峒之上同齋三月心死形廢徐以神視塊  
然見之若嵩山之阿徐以氣聽砰然聞之若雷霆之聲  
吳楚之國有大木焉其名為櫟碧樹而冬生實丹而味  
酸食其皮汁已憤厥之疾齊州珍之渡淮而北而化為  
枳焉鸚鵡不踰濟貉踰汶則死矣地氣然也雖然形氣  
異也性鈞已無相易已生皆全已分皆足已吾何以識  
其巨細何以識其修短何以識其同異哉太形王屋二

山方七百里高萬仞本在冀州之南河陽之北北山愚公者年且九十面山而居懲山北之塞出入之迂也聚室而謀曰吾與汝畢力平險指通豫南達于漢陰可乎雜然相許其妻獻疑曰以君之力曾不能損魁父之丘如太形王屋何且焉置土石雜曰投諸渤海之尾隱土之北遂率子孫荷擔者三夫叩石墾壤箕畚運於渤海之尾鄰人京城氏之孀妻有遺男始齔跳往助之寒暑易節始一反焉河曲智叟笑而止之曰甚矣汝之不惠

以殘年餘力曾不能毀山之一毛其如土石何北山愚  
公長息曰汝心之固固不可徹曾不若孀妻弱子雖我  
之死有子存焉子又生孫孫又生子子又有子子又有  
孫子子孫孫無窮匱也而山不加增何若而不平河曲  
智叟亡以應操蛇之神聞之懼其不已也告之於帝帝  
感其誠命夸蛾氏二子負二山一厝朔東一厝雍南自  
此冀之南漢之陰無隴斷焉大禹曰六合之間四海之  
內照之以日月經之以星辰紀之以四時要之以大歲



神靈所生其物其形或夭或壽唯聖人能通其道夏革  
曰然則亦有不待神靈而生不待陰陽而形不待日月  
而明不待殺戮而夭不待將迎而壽不待五穀而食不  
待繒纊而衣不待舟車而行其道自然非聖人之所通  
也禹之治水土也迷而失塗謬之一國濱北海之北  
不知距齊州幾千萬里其國名曰終北不知際畔之所  
齊限無風雨霜露不生鳥獸蟲魚草木之類四方悉平  
周以喬陟當國之中有山山名壺領狀若甌甑頂有口

狀若員環名曰滋穴有水湧出名曰神瀝臭過蘭椒味  
過醪醴一源分為四埒注於山下經營一國亡不悉徧  
土氣和亡札厲人性婉而從物不競不爭柔心而弱骨  
不驕不忌長幼儕居不君不臣男女雜游不媒不聘緣  
水而居不耕不稼土氣溫適不織不衣百年而死不大  
不病其民孳阜亡數有喜樂亡衰老哀苦其俗好聲相  
攜而迭謠終日不輟音饑倦則飲神瀝力志和平過則  
醉經旬乃醒沐浴神瀝膚色脂澤香氣經旬乃歇周穆

王北游過其國三年忘歸既反周室慕其國愾然自失  
不進酒肉不召嬪御者數月乃復管仲勉齊桓公因游  
遼口俱之其國幾射舉隰朋諫曰君舍齊國之廣人民  
之衆山川之觀殖物之阜禮義之盛章服之美妖靡盈  
庭忠良滿朝肆咤則徒卒百萬視撫則諸侯從命亦奚  
羨於彼而棄齊國之社稷從戎夷之國乎此仲父之耄  
奈何從之桓公乃止以隰朋之言告管仲仲曰此固非  
朋之所及也臣恐彼國之不可知之也齊國之富奚戀

隰朋之言奚顧 瓠巴鼓琴而鳥舞魚躍鄭師文聞之  
棄家從師襄游柱指鉤弦三年不成章師襄曰子可以  
歸矣師文舍其琴嘆曰文非弦之不能鉤非章之不能  
成文所存者不在弦所志者不在聲內不得於心外不  
應於氣故不敢發手而動弦且小假之以觀其後無幾  
何復見師襄師襄曰子之琴何如師文曰得之矣請嘗  
試之於是當春而叩商弦以召南呂涼風忽至草木成  
實及秋而叩角弦以激夾鍾溫風徐回草木發榮當夏

而叩羽弦以召黃鍾霜雪交下川池暴洑及冬而叩徵  
弦以激蕤賓陽光熾烈堅冰立散將終命宮而總四弦  
則景風翔慶雲浮甘露降澧泉涌師襄乃撫心高蹈曰  
微矣子之彈也雖師曠之清角鄒衍之吹律亡以加之  
彼將挾琴執管而從子之後耳 薛譚學謳於秦青未  
窮青之技自謂盡之遂辭歸秦青弗止餞於郊衢撫節  
悲歌聲振林木響遏行雲薛譚乃謝求反終身不敢言  
歸秦青顧謂其友曰昔韓娥東之齊遺糧過雍門鬻歌

假食既去而餘音遶梁欂三日不絕左右以其人弗去  
過逆旅逆旅人辱之韓娥因曼聲哀哭一里老幼悲愁  
垂涕相對三日不食遽而追之娥還復為曼聲長歌一  
里老幼喜躍抃舞弗能自禁忘向之悲也乃厚賂發之  
故雍門之人至今善歌哭放娥之遺聲 伯牙善鼓琴  
鍾子期善聽伯牙鼓琴志在登高山鍾子期曰善哉我  
峩兮若泰山志在流水鍾子期曰善哉洋洋兮若江河  
伯牙所念鍾子期必得之伯牙游於太山之陰卒逢暴

雨止於巖下心悲乃援琴而鼓之初為霖雨之操更造崩山之音曲每奏鍾子期輒窮其趣伯牙乃舍琴而歎曰善哉善哉子之聽夫志想象猶吾心也吾於何逃聲哉 甘蠅古之善射者彀弓而獸伏鳥下弟子名飛衛學射於甘蠅而巧過其師紀昌者又學射於飛衛飛衛曰爾先學不瞬而後可言射矣紀昌歸偃卧其妻之機下以目承牽挺二年之後雖錐末倒背而不瞬也以告飛衛飛衛曰未也亞學視而後可視小如大視微如著

而後告我昌以螳懸蝨於牖南面而望之旬日之間浸大也三年之後如車輪焉以覩餘物皆丘山也乃以燕角之弧朔蓬之筈射之貫蝨之心而懸不絕以告飛衛飛衛高蹈拊膺曰汝得之矣紀昌既盡衛之術計天下之敵已者一人而已乃謀殺飛衛相遇於野二人交射中路矢鋒相觸而墜於地而塵不揚飛衛之矢先窮紀昌遺一矢既發飛衛以棘刺之端扞之而無差焉於是二子泣而投弓相拜於塗請為父子剡臂以誓不得告



術於人 魏黑卯以睚嫌殺丘邴章丘邴章之子來丹  
謀報父之讎丹氣甚猛形甚露計粒而食順風而趨雖  
怒不能稱兵以報之恥假力於人誓手劒以屠黑卯黑  
卯悍志絕衆力抗百夫筋骨皮肉非人類也延頸承刃  
披胸受矢鏹鏑摧屈而體無痕撻負其材力視來丹猶  
雛鷄也來丹之友申他曰子怨黑卯至矣黑卯之易子  
過矣將奚謀焉來丹垂涕曰願子為我謀申他曰吾聞  
衛孔周其祖得殷帝之寶劒一童子服之却三軍之衆

奚不請焉來丹遂適衛見孔周執僕御之禮請先納妻  
子後言所欲孔周曰吾有三劍惟子所擇皆不能殺人  
且先言其狀一曰含光視之不可見運之不知其所有  
觸也泯然無際經物而物不覺二曰承影將旦昧爽之  
交日夕昏明之際北面而察之淡淡焉若有物存莫識  
其狀其所觸焉竊竊然有聲經物而物不疾也三曰宵  
練方晝則見影而不見光方夜見光而不見形其觸物  
也騞然而過隨過隨合覺疾而不血刃焉此三寶者傳

之十三世矣而無施於事匣而藏之未嘗啓封來丹曰  
雖然吾必請其下者孔周乃歸其妻子與齋七日晏陰  
之間跪而受其下劍來丹再拜受之以歸來丹遂執劍  
從黑卵時黑卵之醉偃於牖下自頸至腰三斬之黑卵  
不覺來丹以黑卵之死趣而退遇黑卵之子於門擊之  
三下如投虛黑卵之子方笑曰汝何蚩而三招予來丹  
知劍之不能殺人也歎而歸黑卵既醒怒其妻曰醉而  
露我使我噬疾而腰急其子曰疇昔來丹之來遇我於

門三招我亦使我體疾而支彊彼其厭我哉

命力謂

命曰若之功奚若我哉命曰汝奚功於物而欲比朕力  
曰壽夭窮達貴賤貧富我力之所能也命曰彭祖之智  
不出堯舜之上而壽八百顏淵之才不出衆人之下而  
壽十八仲尼之德不出諸侯之下而困於陳蔡殷紂之  
行不出三仁之上而居君位季札無爵於吳田恒專有  
齊國夷齊餓於首陽季氏富於展禽若是汝力之所能  
奈何壽彼而夭此窮聖而達逆賤賢而貴愚貧善而富

惡邪力曰若如若言我固無功於物而物若此邪此則  
若之所制邪命曰既謂之命奈何有制之者邪朕直而  
推之曲而任之自壽自夭自窮自達自貴自賤自富自  
貧朕豈能識之哉朕豈能識之哉 北宮子謂西門子

曰朕與子竝世也而人子達竝族也而人子敬竝貌也  
而人子愛竝言也而人子庸竝行也而人子誠竝仕也  
而人子貴竝農也而人子富竝商也而人子利朕衣則  
襦褐食則菜糲居則蓬室出則徒行子衣則文錦食則

梁肉居則連櫬出則結駟在家熙然有棄朕之心在朝  
諤然有教朕之色請謁不相及遨遊不同行固有年矣  
子自以德過朕邪西門子曰子無以知其實汝造事而  
窮子造事而達此厚薄之驗歟而皆謂與子竝汝之顏  
厚矣北宮子無以應自失而歸中塗遇東郭先生先生  
曰汝奚往而反僂僂而步有深愧之色邪北宮子言其  
狀東郭先生曰吾將舍汝之愧與汝更之西門氏而問  
之曰汝奚辱北宮子之深乎固且言之西門子曰北宮

子言世族年貌言行與子竝而賤貴貧富與子異子語之曰子無以知其實汝造事而窮子造事而達此將厚薄之驗歟而皆謂與子竝汝之顏厚矣東郭先生曰汝之言厚薄不過言才德之差吾之言厚薄異於是矣夫北宮子厚於德薄於命汝厚於命薄於德汝之達非智得也北宮子之窮非愚失也皆天也非人也而汝以命厚自矜北宮子以德厚自愧皆不識夫固然之理矣西門子曰先生止矣余不敢復言北宮子既歸衣其裋褐

有狐貉之溫進其菰菽有稻粱之味底其蓬室若廣廈之陰乘其華輅若文軒之飾終身迫然不知榮辱之在彼在我也東郭先生聞之曰北宮子之寐久矣一言而能寤易怛也哉

說符

子列子學於壺丘子林壺丘子林

曰子知持後則可言持身矣列子曰願聞持後曰顧若影則知之列子顧而觀影形枉則影曲形直則影正然則枉直隨形而不在影屈伸任物而不在我此之謂持後而處先宋人有為其君以玉為楮葉者三年而成



鋒殺莖柯毫芒繁澤亂之楮葉中而不可別也此人遂以巧食宋國子列子聞之曰使天地之生物三年而成一葉則物之有葉者寡矣故聖人恃道化而不恃智巧魯施氏有二子其一好學其一好兵好學者以術干齊侯齊侯納之為諸公子之傅好兵者之楚以法干楚王王說之以為軍正祿富其家爵榮其親施氏之鄰人孟氏同有二子所業亦同而窘於貧羨施氏之有因從請進趣之方二子以實告孟氏孟氏之一子之秦以術

干秦王秦王曰當今諸侯力爭所務兵食而已若用仁義治吾國是滅亡之道遂宮而放之其一子之衛以法干衛侯衛侯曰吾弱國也而攝乎大國之間大國吾事之小國吾撫之是求安之道若賴兵權滅亡可待矣若全而歸之適於他國為吾之患不輕矣遂刖之而還諸魯既反孟氏之父子叩胸而讓施氏施氏曰凡得時者昌失時者亡子道與吾同而功與吾異失時者也非行之謬也且天下理無常是事無常非先日所用今或棄

之今之所棄後或用之此用與不用無定是非也投隙抵時應事無方屬乎智智苟不足使若博如孔丘術如呂尚焉往而不窮哉孟氏父子舍然無愠容曰吾知之矣子勿重言 昔人言有知不死之道者燕君使人受之不捷而言者死燕君甚怒其使者將加誅焉幸臣諫曰人所憂者莫急乎死已所重者莫過乎生彼自喪其生安能令君不死也乃不誅有齊子亦欲學其道聞言者之死乃撫膺而恨富子聞而笑之曰夫所欲學不死

其人已死而猶恨之是不知所以為學胡子曰富子之言非也凡人有術不能行者有矣能行而無其術者亦有矣衛人有善數者臨死以訣諭其子其子志其言而不能行也他人問之以其父所言告之問者用其言而行其術與其父無差焉若然死者奚為不能言生術哉牛缺者上地之大儒也下之邯鄲遇盜於耦沙之中盡取其衣裝車牛步而去視之歡然無憂吝之色盜追而問其故曰君子不以所養害其所養盜曰噫賢矣夫

既而相謂曰以彼之賢往見趙君使以我為必困我不  
如殺之乃相與追而殺之燕人聞之聚族相戒曰遇盜  
莫如上地之牛缺也皆受教俄而其弟適秦至關下果  
遇盜憶其兄戒之因與盜力爭既而不如又追而以卑  
辭請物盜怒曰吾活汝弘矣而追吾不已迹將著焉既  
為盜矣仁將焉在遂殺之又傷害其黨四五人焉虞  
氏者梁之富人也家充殷盛錢帛無量財貨無訾登高  
樓臨大路設樂陳酒擊博樓上俠客相隨而行樓上博

者射明瓊張中反兩擒魚而笑飛鳶適墜其腐鼠而中  
之俠客相與言曰虞氏富樂之日久矣而常有輕易人  
之志吾不侵犯之而乃辱我以腐鼠此而不報無以立  
謹於天下請與若等戮力一志率徒屬必滅其家為等  
倫皆許諾至期日之夜聚衆積兵以攻虞氏大滅其家  
東方有人焉曰爰旌目將有適也而餓於道狐父之  
盜曰丘見而下壺飧以饋之爰旌目三饋而後能視曰  
子何為者也曰我狐父之人丘也爰旌目曰嘻汝非盜

邪胡為而食我吾義不食汝之食也兩手據地而歐之  
不出喀喀然遂伏而死狐父之人則盜矣而食非盜也  
以人之盜因謂食為盜而不敢食是失名實者也 宋  
人有遊於道得人遺契者歸而藏之密數其齒告鄰人  
曰吾富可待矣 人有枯梧樹者其鄰父言枯梧之樹  
不祥其鄰人遽而伐之鄰人父因請以為薪其人乃不  
說曰鄰人之父徒欲為薪而教吾伐之也與我鄰若此  
其險豈可哉 人有亡鈇者意其鄰之子視其行步竊

鈇也顏色竊鈇也言語竊鈇也動作態度無為而不竊鈇也俄而扣其谷而得其鈇他日復見其鄰人之子動作態度無似竊鈇者 昔齊人有欲金者清旦衣冠而之市適鬻金者之所因攫其金而去吏捕得之問曰人皆在焉子攫人之金何對曰取金之時不見人徒見金

子列子窮容貌有饑色客有言之鄭子陽者曰列禦寇蓋有道之士也居君之國而窮君無乃為不好士乎

鄭子陽即令官遺之粟子列子出見使者再拜而辭使



者去子列子入其妻望之而拊心曰妾聞為有道者之  
妻子皆得佚樂今有饑色君過而遺先生食先生不受  
豈不命也哉子列子笑謂之曰君非自知我也以人之  
言而遺我粟至其罪我也且又以人之言此吾所以不  
受也其卒民果作難而殺子陽

戰國策史疾為韓使楚楚王問曰客何方所循曰治列  
子圍寇之言曰何貴曰貴正王曰正亦可為國乎曰可  
王曰楚國多盜正可以圍盜乎曰可曰以正圍盜奈何

頃間有鵲止於屋上者曰請問楚人謂之何王曰謂之鵲謂之烏可乎曰不可曰今王之國有柱國令尹司馬典令其任官置吏必曰廉潔勝任今盜賊公行而弗能禁也此烏不為烏鵲不為鵲也

已上  
列子

史記莊子者蒙人也名周周嘗為蒙漆園吏與梁惠王齊宣王同時其學無所不闢然其要本歸於老子之言故其著書十餘萬言大抵率寓言也作漁父盜跖胠篋以詆訛孔子之徒以明老子之術畏累虛亢桑子之屬

皆空語無事實然善屬書離辭指事類情用剝剝儒墨  
雖當世宿學不能自解免也其言沈洋自恣以適已故  
自王公大人不能器之

漢書道家莊子五  
十二篇名周宋人

莊子

逍遙

北冥有魚其名為鯢鯢之大不知其幾千里

也化而為鳥其名為鵬鵬之背不知其幾千里也怒而  
飛其翼若垂天之雲是鳥也海運則將徙於南冥南冥  
者天池也齊諧者志怪者也諧之言曰鵬之徙於南冥  
也水擊三千里搏扶搖而上者九萬里去以六月息者

也野馬也塵埃也生物之以息相吹也天之蒼蒼其正色邪其遠而無所至極邪其視下也亦若是則已矣且夫水之積也不厚則負大舟也無力覆杯水於坳堂之上則芥為之舟置杯焉則膠水淺而舟大也風之積也不厚則其負大翼也無力故九萬里則風斯在下矣而後乃今培風背負青天而莫之夭闕者而後乃今將圖南蜩與鷺鳩笑之曰我決起而飛搶榆枋時則不至而控於地而已矣奚以之九萬里而南為適莽蒼者三餐

而反腹猶果然適百里者宿春糧適千里者三月聚糧之二蟲又何知小知不及大知小年不及大年奚以知其然也朝菌不知晦朔蟪蛄不知春秋此小年也楚之南有冥靈者以五百歲為春五百歲為秋上古有大椿者以八千歲為春八千歲為秋而彭祖乃今以久特聞衆人匹之亦悲乎湯之問棘也是已窮髮之北有冥海者天池也有魚焉其廣數千里未有知其脩者其名爲鯨有鳥焉其名爲鵬背若泰山翼若垂天之雲搏扶

搖羊角而上者九萬里絕雲氣負青天然後圖南且適南冥也斥鴳笑之曰彼且奚適也我騰躍而上不過數仞而下翱翔蓬蒿之間此亦飛之至也而彼且奚適也此小大之辨也故夫知效一官行比一鄉德合一君而徵一國者其自視也亦若此矣而宋榮子猶然笑之且舉世而譽之而不加勸舉世而非之而不加沮定乎內外之分辨乎榮辱之境斯已矣彼其於世未數數然也雖然猶有未樹也夫列子御風而行泠然善也旬有五

日而後反彼於致福者未數數然也此雖免乎行猶有所待者也若夫乘天地之正而御六氣之辨以游無窮者彼且惡乎待哉故曰至人無已神人無功聖人無名惠子謂莊子曰魏王貽我大瓠之種我樹之成而實五石以盛水漿其堅不能自舉也剖之以為瓢則瓠落無所容非不呶然大也吾為其無用而掊之莊子曰夫子固拙於用大矣宋人有善為不龜手之藥者世以泝泝統為事客聞之請買其方百金聚族而謀曰我世

世為汧澥統不過數金今一朝而鬻技百金請與之客  
得之以說吳王越有難吳王使之將冬與越人水戰大  
敗越人裂地而封之能不龜手一也或以封或不免於  
汧澥統則所用之異也今子有五石之瓠何不慮以為  
大樽而浮乎江湖而憂其瓠落無所容則夫子猶有蓬  
之心也夫 惠子謂莊子曰吾有大樹人謂之樗其大  
本擁腫而不中繩墨其小枝卷曲而不中規矩立之塗  
匠者不顧今子之言大而無用衆所同去也莊子曰子



獨不見狸狌乎卑身而伏以候敖者東西跳梁不避高下中於機辟死於罔罟今夫簾牛其大若垂天之雲此能為大矣而不能執鼠今子有大樹患其無用何不樹之於無何有之鄉廣莫之野彷徨乎無為其側逍遙乎寢卧其下不夭斤斧物無害者無所可用安所困苦哉

至樂

天下有至樂無有哉有可以活身者無有哉今奚

為奚據奚避奚處奚就奚去奚樂奚惡夫天下之所尊者富貴壽善也所樂者身安厚味美服好色音聲也所

下者貧賤天惡也所苦者身不得安逸口不得厚味形  
不得美服目不得好色耳不得音聲若不得者則大憂  
以懼其為形也亦愚哉夫富者苦身疾作多積財而不  
得盡用其為形也亦外矣夫貴者夜以繼日思慮善否  
其為形也亦疏矣人之生也與憂俱生壽者惛惛久憂  
不死何之苦也其為形也亦遠矣烈士為天下見善矣  
未足以活身吾未知善之誠善邪誠不善邪若以為善  
矣不足活身以為不善矣足以活人故曰忠諫不聽蹲

循勿爭故夫子胥爭之以殘其形不爭名亦不成誠有  
善無有哉今俗之所為與其所樂吾又未知樂之果樂  
邪果不樂邪吾觀夫俗之所樂舉羣趣者誣誣然如將  
不得已而皆曰樂者吾未之樂也亦未之不樂也果有  
樂無有哉吾以無為誠樂矣又俗之所大苦也故曰至  
樂無樂至譽無譽天下是非果未可定也雖然無為可  
以定是非至樂活身唯無為幾存請嘗試言之天無為  
以之清地無為以之寧故兩無為相合萬物皆化芒乎

芴乎而無從出乎芴乎芒乎而無有象乎萬物職職皆  
從無為殖故曰天地無為也而無不為也人也孰能得  
無為哉 莊子妻死惠子弔之莊子則方箕踞鼓盆而  
歌惠子曰與人居長子老身死不哭亦足矣又鼓盆而  
歌不亦甚乎莊子曰不然是其始死也我獨何能無槩  
然察其始而本無生非徒無生也而本無形非徒無形  
也而本無氣雜乎芒芴之間變而有氣氣變而有形形  
變而有生今又變而之死是相與為春秋冬夏四時行

也人且偃然寢於巨室而我噉噉然隨而哭之自以為不通乎命故止也 支離叔與滑介叔觀於冥伯之丘崑崙之虛黃帝之所休俄而柳生其左肘其意蹙蹙然惡之支離叔曰子惡之乎滑介叔曰亡予何惡生者假借也假之而生生者塵垢也死生為晝夜且吾與子觀化而化及我我又何惡焉 莊子之楚見空髑髏髑髏然有形擲以馬捶因而問之曰夫子貪生失理而為此乎將子有亡國之事斧鉞之誅而為此乎將子有不善之

行愧遺父母妻子之醜而為此乎將子有凍餒之患而  
為此乎將子之春秋故及此乎於是語卒援髑髏枕而  
卧夜半髑髏見夢曰子之談者似辯士諸子所言皆生  
人之累也死則無此矣子欲聞死之說乎莊子曰然髑  
髏曰死無君於上無臣於下亦無四時之事從然以天  
地為春秋雖南面王樂不能過也莊子不信曰吾使司  
命復生子形為子骨肉肌膚反子父母妻子閭里知識  
子欲之乎髑髏深贖蹙頰曰吾安能棄南面王樂而復

為人間之勞乎

外物

外物不可必故龍逢誅比干戮箕

子狂惡來死桀紂亡人主莫不欲其臣之忠而忠未必  
信故伍員流于江蓁弘死于蜀藏其血三年而化為碧  
人親莫不欲其子之孝而孝未必愛故孝已憂而曾參  
悲木與木相摩則然金與火相守則流陰陽錯行則天  
地大絃於是乎有雷有霆水中有火乃焚大槐有甚憂  
兩陷而無所逃墮螭不得成心若縣於天地之間慰賢  
沈屯利害相摩生火甚多衆人焚和月固不勝火於是

乎有償然而道盡 任公子為大鉤巨緇五十犗以為  
餌蹲乎會稽投竿東海旦旦而釣期年不得魚已而大  
魚食之牽巨鉤銘沒而下驚揚而奮鬐白波若山海水  
震蕩聲侔鬼神憚赫千里任公子得若魚離而腊之自  
澗河以東蒼梧以北莫不厭若魚者已而後世輕才諷  
說之徒皆驚而相告也夫揭竿累趣灌瀆守鯢鮒其於  
得大魚難矣飾小說以干縣令其於大達亦遠矣是以  
未嘗聞任氏之風俗其不可與經於世亦遠矣 儒以



詩禮發冢大儒臚傳曰東方作矣事之何若小儒曰未  
解裙襦口中有珠詩固有之曰青青之麥生於陵陂生  
不布施死何含珠為接其鬚壓其顙儒以金椎控其頤  
徐別其頰無傷口中珠 惠子謂莊子曰子言無用莊  
子曰知無用而始可與言用矣夫地非不廣且大也人  
之所用容足耳然則廁足而墊之致黃泉人尚有用乎  
惠子曰無用莊子曰然則無用之為用也亦明矣 莊  
子曰人有能遊且得不遊乎人而不能遊且得遊乎夫

流通之志決絕之行噫其非至知厚德之任與覆墜而  
不反火馳而不顧雖相與為君臣時也易世而無以相  
賤故曰至人不留行焉夫尊古而卑今學者之流也且  
以狶韋氏之流觀今之世夫孰能不波唯至人乃能遊  
於世而不僻順人而不失已彼教不學承意不彼目徹  
為明耳徹為聰鼻徹為鷙口徹為甘心徹為知知徹為  
德凡道不欲壅壅則哽哽而不止則跖跖則衆害生物  
之有知者恃息其不殷非天之罪天之穿之日夜無降

人則顧塞其實胞其重閤心有天遊室無空虛則婦姑  
勃僊心無天遊則六鑿相攘大林丘山之善於人也亦  
神者不勝德溢乎名名溢乎暴謀稽乎謚知出乎爭柴  
生乎守官事果乎衆宜春雨日時草木怒生銚鑷於是  
乎始脩草木之到植者過半而不知其然靜然可以補  
病皆賊可以休老寧可以止遽雖然若是勞者之務也  
非佚者之所未嘗過而問焉聖人之所以馘天下神人  
未嘗過而問焉賢人所以馘世聖人未嘗過而問焉君

子所以駭國賢人未嘗過而問焉小人所以合時君子  
未嘗過而問焉演門有親死者以善毀爵以官師其黨  
人毀而死者半堯與許由天下許由逃之湯與務光務  
光怒之紀他聞之帥弟子而跋於窾水諸侯弔之三年  
申徒狄因以踣河筌者所以在魚得魚而忘筌蹄者所  
以在兔得兔而忘蹄言者所以在意得意而忘言吾安  
得夫忘言之人而與之言哉

繕性

繕性於俗俗學以求

復其初滑欲於俗思以求致其明謂之蔽蒙之民古之

治道者以恬養知生而無以知為也謂之以知養恬知與恬交相養而和理出其性夫德和也道理也德無不容仁也道無不理義也義明而物親忠也中純實而反乎情樂也信行容體而順乎文禮也禮樂偏行則天下亂矣彼正而蒙已德德則不冒冒則物必失其性也古之人在混茫之中與一世而得澹漠焉當是時也陰陽和靜鬼神不擾四時得節萬物不傷羣生不夭人雖有知無所用之此之謂至一當是時也莫之為而常自然

逮德下衰及燧人伏羲始為天下是故順而不一德又  
下衰及神農黃帝始為天下是故安而不順德又下衰  
及唐虞始為天下興治化之流濠淳散朴離道以善險  
德以行然後去性而從於心心與心識知而不足以定  
天下然後附之以文益之以博文滅質博溺心然後民  
始惑亂無以反其性情而復其初由是觀之世喪道矣  
道喪世矣世與道交相喪也道之人何由興乎世世亦  
何由興乎道哉道無以興乎世世無以興乎道雖聖人

不在山林之中其德隱矣隱故不自隱古之所謂隱士者非伏其身而弗見也非閉其言而不出也非藏其知而不發也時命大謬也當時命而大行乎天下則反一無迹不當時命而大窮乎天下則深根寧極而待此存身之道也古之存身者不以辯飾知不以知窮天下不以知窮德危然處其所而反其性已又何為哉道固不小行德固不小識小識傷德小行傷道故曰正己而已矣樂全之謂得志古之所謂得志者非軒冕之謂也謂

其無以益其樂而已矣今之所謂得志者軒冕之謂也  
軒冕在身非性命也物之儻來寄也寄之其來不可圉  
其去不可止故不為軒冕肆志不為窮約趨俗其樂彼  
與此同故無憂而已矣今寄去則不樂由是觀之雖樂  
未嘗不荒也故曰喪已於物失性於俗者謂之倒置之

民

齊物  
論

南郭子綦隱几而坐仰天而噓嗒焉似喪其

耦顏成子游立侍乎前曰何居乎形固可使如槁木而  
心固可使如死灰乎今之隱几者非昔之隱几者也子



綦曰偃不亦善乎而問之也今者吾喪我汝知之乎女聞人籟而未聞地籟女聞地籟而未聞天籟夫子游曰敢問其方子綦曰夫大塊噫氣其名爲風是唯無作作則萬竅怒呿而獨不聞之蓁蓁乎山林之畏佳大木百圍之竅穴似鼻似口似耳似枅似圈似臼似洼者似汚者激者謫者叱者吸者叫者譟者突者咬者前者唱于而隨者唱喁泠風則小和飄風則大和厲風濟則衆竅爲虛而獨不見之調調之刁刁乎子游曰地籟則衆竅

是己人籟則比竹是己敢問天籟子綦曰夫吹萬不同  
而使其自己也咸其自取怒者其誰邪大知閑閑小知  
閒閒大言炎炎小言詹詹其寐也魂交其覺也形開與  
接為構日以心鬪縵者窖者密者小恐惴惴大恐縵縵  
其發若機括其司是非之謂也其留如詛盟其守勝之  
謂也其殺如秋冬以言其日消也其溺之所為之不可  
使復之也其厭也如緘以言其老洫也近死之心莫使  
復陽也喜怒哀樂慮嘆變熱姚佚啓態樂出虛蒸成菌

日夜相代乎前而莫知其所萌已乎已乎旦暮得此其所由以生乎非彼無我非我無所取是亦近矣而不知其所為使若有真宰而特不得其朕可行已信而不見其形有情而無形百骸九竅六藏賅而存焉吾誰與為親汝皆說之乎其有私焉如是皆有為臣妾乎其臣妾不足以相治乎其遞相為君臣乎其有真君存焉如求得其情與不得無益損乎其真一受其成形不亡以待盡與物相刃相靡其行盡如馳而莫之能止不亦悲乎

終身後役而不見其成功蕭然疲役而不知其所歸可不哀邪人謂之不死奚益其形化其心與之然可不謂大哀乎人之生也固若是芒乎其我獨芒而人亦有不芒者乎夫隨其成心而師之誰獨且無師乎奚必知代而心自取者有之愚者與有焉未成乎心而有是非是今日適越而昔至也是以無有為有無有為有雖有神禹且不能知吾獨且奈何哉夫言非吹也言者有言其所言者特未定也果有言邪其未嘗有言邪其以為異

於轂音亦有辯乎其無辯乎道惡乎隱而有真偽言惡  
乎隱而有是非道惡乎往而不存言惡乎存而不可道  
隱於小成言隱於榮華故有儒墨之是非以是其所非  
而非其所是欲是其所非而非其所是則莫若以明物  
無非彼物無非是自彼則不見自知則知之故曰彼出  
於是是亦因彼彼是方生之說也雖然方生方死方死  
方生方可方不可方可因是因非因非因是是以聖人  
不由而照之于天亦因是也是亦彼也彼亦是

也彼亦一是非此亦一是非果且有彼是乎哉果且無  
彼是乎哉彼是莫得其偶謂之道樞樞始得其環中以  
應無窮是亦一無窮非亦一無窮也故曰莫若以明以  
指喻指之非指不若以非指喻指之非指也以馬喻馬  
之非馬不若以非馬喻馬之非馬也天地一指也萬物  
一馬也可乎可不可乎不可道行之而成物謂之而然  
惡乎然然於然惡乎不然不然於不然物固有所然物  
固有所可無物不然無物不可故為是舉筵與楹厲與

西施恢惋慙怪道通為一其分也成也其成也毀也凡物無成與毀復通為一唯達者知通為一為是不用而寓諸庸庸也者用也用也者通也通也者得也適得而幾矣因是已而不知其然謂之道勞神明為一而不知其同也謂之朝三何謂朝三曰狙公賦芋曰朝三而莫四衆狙皆怒曰然則朝四而莫三衆狙皆說名實未虧而喜怒為用亦因是也是以聖人和之以是非而休乎天鈞是之謂兩行古之人其知有所至矣惡乎至有

以為未始有物者至矣盡矣不可以加矣其次以為有物矣而未始有封也其次以為有封焉而未始有是非也是非之彰也道之所以虧也道之所以虧愛之所以成果且有成與虧乎哉果且無成與虧乎哉有成與虧故昭氏之鼓琴也無成與虧故昭氏之不鼓琴也昭文之鼓琴也師曠之技也惠子之據梧也三子之知幾乎皆其盛者也故載之末年唯其好之也以異於彼其好之也欲以明之彼非所明而明之故以堅白之昧終



而其子又以文之綸緒終身無成若是而可謂成乎雖  
我亦成也若是而不可謂成乎物與我無成也是故滑  
疑之耀聖人之所圖也為是不用而寓諸庸此之謂以  
明今且有言於此不知其與是類乎其與是不類乎類  
與不類相與為類則與彼無以異矣雖然請嘗言之有  
始也者有未始有始也者有未始有夫未始有始也者  
有有也者有無也者有未始有無也者有未始有夫未  
始有無也者俄而有無矣而未知有無之果孰有孰無

也今我則已有謂矣而未知吾所謂之其果有謂乎其  
果無謂乎天下莫大於秋豪之末而太山為小莫壽乎  
殤子而彭祖為夭天地與我並生而萬物與我為一既  
已為一矣且得有言乎既已謂之一矣且得無言乎一  
與言為二二與一為三自此以往巧歷不能得而況其  
凡乎故自無適有以至於三而況自有適有乎無適焉  
因是已夫道未始有封言未始有常為是而有畛也請  
言其畛有左有右有倫有義有分有辯有競有爭此之

謂八德六合之外聖人存而不論六合之內聖人論而不議春秋經世先王之志聖人議而不辯故分也者有不分也辯也者有不辯也曰何也聖人懷之衆人辯之以相示也故曰辯也者有不見也夫大道不稱大辯不言大仁不仁大廉不嚙大勇不忤道昭而不道言辯而不及仁常而不成廉清而不信勇忤而不成五者因而幾向方矣故知止其所不知至矣孰知不言之辯不道之道若有能知此之謂天府注焉而不滿酌焉而不竭

而不知其所由來此之謂葆光 瞿鵲子問乎長梧子  
曰吾聞諸夫子聖人不從事於務不就利不違害不喜  
求不緣道無謂有謂有謂無謂而遊乎塵垢之外夫子  
以為孟浪之言而我以為妙道之行也吾子以為奚若  
長梧子曰是黃帝之所聽熒也而丘也何足以知之且  
女亦大早計見卵而求時夜見彈而求鶚炙子試為女  
妄言之女以妄聽之奚旁日月挾宇宙為其胞合置其  
滑漚以隸相尊衆人役役聖人愚若參萬歲而一成純

萬物盡然而以是相蘊予惡乎知說生之非惑邪予惡乎知惡死之非弱喪而不知歸者邪麗之姬艾封人之子也晉國之始得之也涕泣沾襟及其至於王所與王同筐牀食芻豢而後悔其泣也予惡乎知夫死者不悔其始之蘄生乎夢飲酒者旦而哭泣夢哭泣者旦而田獵方其夢也不知其夢也夢之中又占其夢焉覺而後知其夢也且有覺而後知此其大夢也而愚者自以為覺竊竊然知之君乎牧乎固哉丘也與女皆夢也予

謂女夢亦夢也是其言也其名為弔詭萬世之後而一  
遇大聖知其解者是旦暮遇之也既使我與若辯矣若  
勝我我不若勝若果是也我果非也邪我勝若若不吾  
勝我果是也而果非也邪其或是也其或非也邪其俱  
是也其俱非也邪我與若不能相知也則人固受其黷  
闇吾誰使正之使同乎若者正之既與若同矣惡能正  
之使同乎我者正之既同乎我矣惡能正之使異乎我  
與若者正之既異乎我與若矣惡能正之使同乎我與

若者正之既同乎我與若矣惡能正之然則我與若與人俱不能相知也而待彼也邪何謂和之以天倪曰是不是然不然是若果是也則是之異乎不是也亦無辯然若果然也則然之異乎不然也亦無辯化聲之相待若其不相待和之以天倪因之以曼行所以窮年也忘年忘義振於無竟故寓諸無竟罔兩問景曰曩子行今子止曩子坐今子起何其無特操與景曰吾有待而然者邪吾所待又有待而然者邪吾待蛇蚶蜺翼邪惡識

所以然惡識所以不然昔者莊周夢為胡蝶栩栩然胡蝶也自喻適志與不知周也俄然覺則蘧蘧然周也不知周之夢為胡蝶與胡蝶之夢為周與周與胡蝶則必有分矣此之謂物化

秋水

秋水時至百川灌河涇流之

大兩涘渚崖之間不辯牛馬於是焉河伯欣然自喜以天下之美為盡在已順流而東行至於北海東面而視不見水端於是焉河伯始旋其面目眊洋向若而歎曰野語有之曰聞道百以為莫已若者我之謂也且夫我



嘗聞少仲尼之聞而輕伯夷之義者始吾弗信今我睹  
子之難窮也吾非至於子之門則殆矣吾長見笑於大  
方之家北海若曰井鼃不可以語於海者拘於虛也夏  
蟲不可以語於冰者篤於時也曲士不可以語於道者  
束於教也今爾出於崖溪觀於大海乃知爾醜爾將可  
與語大理矣天下之水莫大於海萬川歸之不知何時  
止而不盈尾閭泄之不知何時已而不虛春秋不變水  
旱不知此其過江河之流不可為量數而吾未嘗以此

自多者自以比形於天地而受氣於陰陽吾在於天地之間猶小石小木之在大山也方存乎見少又奚以自多計四海之在天地之間也不似礪空之在大澤乎計中國之在海內不似稊米之在太倉乎號物之數謂之萬人處一焉人卒九州穀食之所生舟車之所通人處一焉此其比萬物也不似豪末之在於馬體乎五帝之所連三王之所爭仁人之所憂任士之所勞盡此矣伯夷辭之以為名仲尼語之以為博此其自多也不似爾

向之自多於水乎河伯曰然則吾大天地而小毫末可乎北海若曰否夫物量無窮時無止分無常終始無故是故大知觀於遠近故小而不寡大而不多知量無窮證羣今故故遷而不悶掇而不跂知時無止察乎盈虛故得而不喜失而不憂知分之無常也明乎坦塗故生而不說死而不禍知終始之不可故也計人之所知不若其所不知其生之時不若未生之時以其至小求窮其至大之域是故迷亂而不能自得也由此觀之又何

以知毫末之足以定至細之倪又何以知天地之足以窮至大之域河伯曰世之議者皆曰至精無形至大不可圍是信情乎北海若曰夫自細視大者不盡自大視細者不明夫精小之微也埤大之殷也故異便此勢之有也夫精粗者期於有形者也無形者數之所不能分也不可圍者數之所不能窮也可以言論者物之粗也可以意致者物之精也言之所不能論意之所不能察致者不期精粗焉是故大人之行不出乎害人不多仁

恩動不為利不賤門隸貨財弗爭不多辭讓事焉不借  
人不多食乎力不賤貪汙行殊乎俗不多辟異為在從  
衆不賤佞諂世之爵祿不足以為勸戮恥不足以為辱  
知是非之不可為分細大之不可為倪聞曰道人不聞  
至德不得大人無已約分之至也河伯曰若物之外若  
物之內惡至而倪貴賤惡至而倪小大北海若曰以道  
觀之物無貴賤以物觀之自貴而相賤以俗觀之貴賤  
不在已以差觀之因其所大而大之則萬物莫不大因

其所小而小之則萬物莫不小知天地之為稊米也知  
豪末之為丘山也則差數觀矣以功觀之因其所有而  
有之則萬物莫不有因其所無而無之則萬物莫不無  
知東西之相反而不可以相無則功分定矣以趣觀之  
因其所然而然之則萬物莫不然因其所非而非之則  
萬物莫不非知堯桀之自然而相非則趣操觀矣昔者  
堯舜讓而帝之噲讓而絕湯武爭而王白公爭而滅由  
此觀之爭讓之禮堯桀之行貴賤有時未可以為常也

梁麗可以衝城而不可以窒穴言殊器也騏驎驊騮一日而馳千里捕鼠不如狸狌言殊技也鵙鵙夜撮蚤察豪末晝出瞋目而不見丘山言殊性也故曰蓋師是而無非師治而無亂乎是未明天地之理萬物之情者是猶師天而無地師陰而無陽其不可行明矣然且語而不舍非愚則誣也帝王殊禪三代殊繼差其時逆其俗者謂之篡夫當其時順其俗者謂之義之徒默默乎河伯女惡知貴賤之門小大之家河伯曰然則我何為

乎何不為乎吾辭受趣舍吾終奈何北海若曰以道觀之何貴何賤是謂反衍無拘而志與道大蹇何少何多是謂謝施無一而行與道參差嚴乎若國之有君其無私德繇繇乎若祭之有社其無私福泛泛乎其若四方之無窮其無所畛域兼懷萬物其孰承翼是謂無方萬物一齊孰短孰長道無終始物有死生不恃其成一虛一滿不位乎其形年不可舉時不可止消息盈虛終則有始是所以語大義之方論萬物之理也物之生也若



驟若馳無動而不變無時而不移何為乎何不為乎夫  
固將自化河伯曰然則何貴於道邪北海若曰知道者  
必達於理達於理者必明於權明於權者不以物害已  
至德者火弗能熱水弗能溺寒暑弗能害禽獸弗能賊  
非謂其薄之也言察乎安危寧於禍福謹於去就莫之  
能害也故曰天在內人在外德在乎天知天人之行本  
乎天位乎得蹢躅而屈伸反要而語極曰何謂天何謂  
人北海若曰牛馬四足是謂天落馬首穿牛鼻是謂人

故曰無以人滅天無以故滅命無以得殉名謹守而勿失是謂反其真 夔憐蛇蛇憐蛇蛇憐風風憐目目憐心夔謂蛇曰吾以一足跼蹐而行予無如矣今子之使萬足獨奈何蛇曰不然子不見夫唾者乎噴則大者如珠小者如霧雜而下者不可勝數也今子動吾天機而不知其所以然蛇謂蛇曰吾以衆足行而不及子之無足何也蛇曰夫天機之所動何可易邪吾安用足哉蛇謂風曰子動吾脊脅而行則有似也今子蓬蓬然起於

北海蓬蓬然入於南海而似無有何也風曰然子蓬蓬然起於北海而入於南海也然而指我則勝我鱗我亦勝我雖然夫折大水蜚大屋者唯我能也故以衆小不勝為大勝也為大勝者唯聖人能之 惠子相梁莊子往見之或謂惠子曰莊子來欲代子相於是惠子恐搜於國中三日三夜莊子往見之曰南方有鳥其名鵩鵩子知之乎夫鵩鵩發於南海而飛於北海非梧桐不止非練實不食非醴泉不飲於是鵩得腐鼠鵩過之仰

而視之曰嚇今子欲以子之梁國而嚇我邪

莊子逸篇  
惠子始與

莊子相見而問乎莊子曰今日自以為鳳凰而徒遭燕  
雀耳坐者俱笑 淮南子惠子從車百乘以過孟諸莊

子見之棄  
其餘魚

莊子與惠子遊於濠梁之上莊子曰儵魚

出游從容是魚樂也惠子曰子非魚安知魚之樂莊子

曰子非我安知我不知魚之樂惠子曰我非子固不知

子矣子固非魚也子之不知魚之樂全矣莊子曰請循

其本子曰女安知魚樂云者既已知吾知之而問我我

知之濠上也

寓言

言 寓言十九重言十七卮言日出和以

天倪寓言十九藉外論之親父不為其子媒親父譽之不若非其父者也非吾罪也人之罪也與已同則應不與已同則反同於已為是之異於已為非之重言十七所以已言也是為耆艾年先矣而無經緯本末以期年耆者是非先也人而無以先人無人道也人而無人道是之謂陳人卮言日出和以天倪因以曼衍所以窮年不言則齊齊與言不齊言與齊不齊也故曰無言言無言終身言未嘗言終身不言未嘗不言有自也而可有


自也而不可有自也而然有自也而不然惡乎然然於  
然惡乎不然不然於不然惡乎可可於可惡乎不可不  
可於不可物固有所然物固有所可無物不然無物不  
可非卮言日出和以天倪孰得其久萬物皆種也以不  
同形相禪始卒若環莫得其倫是謂天鈞天鈞者天倪  
也 莊子謂惠子曰孔子行年六十而六十化始時所  
是卒而非之未知今之所謂是之非五十九非也惠子  
曰孔子勤志服知也莊子曰孔子謝之矣而其未之嘗

言孔子云夫受才乎大本復靈以生鳴而當律言而當  
法利義陳乎前而好惡是非直服人之口而已矣使人  
乃以心服而不敢譴立定天下之定已乎已乎吾且不  
得及彼乎 顏成子游謂東郭子綦曰自吾聞子之言  
一年而野二年而從三年而通四年而物五年而來六  
年而鬼入七年而天成八年而不知死不知生九年而  
大妙生有為死也勸公以其死也有自也而生陽也無  
自也而果然乎惡乎其所適惡乎其所不適天有歷數

地有人據吾惡乎求之莫知其所終若之何其無命也  
莫知其所始若之何其有命也有以相應也若之何其  
無鬼邪無以相應也若之何其有鬼邪衆罔兩問於景  
曰若向也俯而今也仰向也括而今也被髮向也坐而  
今也起向也行而今也止何也景曰搜搜也奚稍問也  
予有而不知其所以予蜩甲也蟬蛻也似之而非也火  
與日吾屯也陰與夜吾代也彼吾所以有待邪而況乎  
以有待者乎彼來則我與之來彼往則我與之往彼強



陽則我與之強陽強陽者又何以有問乎



繹史卷一百十二上

欽定四庫全書

史部

繹史卷一百十二下

詳校官檢討臣羅國俊

編修臣裴謙覆勘

覆校官博士臣劉光第

校對官典簿臣劉景岳

謄錄監生臣林大本

欽定四庫全書

繹史卷一百二十二

靈壁縣知縣馬驥撰

列莊之學下

莊子

養生主

吾生也有涯而知也無涯以有涯隨無涯殆

已已而為知者殆而已矣為善無近名為惡無近刑緣督以為經可以保身可以全生可以養親可以盡年

庖丁為文惠君解牛手之所觸肩之所倚足之所履膝之所踣砉然騞然奏刀騞然莫不中音合於桑林之舞

乃中經首之會文惠君曰譚善哉技蓋至此乎庖丁釋  
刀對曰臣之所好者道也進乎技矣始臣之解牛之時  
所見無非牛者三年之後未嘗見全牛也方今之時臣  
以神遇而不以目視官知止而神欲行依乎天理批大  
卻導大窾因其固然技經肯綮之未嘗而況大軋乎良  
庖歲更刀割也族庖月更刀折也今臣之刀十九年矣  
所解數千牛矣而刀刃若新發於硎彼節者有閒而刀  
刃者無厚以無厚入有閒恢恢乎其於遊刃必有餘地

矣是以十九年而刀刃若新發於硎雖然每至於族吾  
見其難為怵然為戒視為止行為遲動刀甚微謦然已  
解如土委地提刀而立為之四顧為之躊躇滿志善刀  
而藏之文惠君曰善哉吾聞庖丁之言得養生焉公  
文軒見右師而驚曰是何人也惡乎介也天與其人與  
曰天也非人也天之生是使獨也人之貌有與也以是  
知其天也非人也澤雉十步一啄百步一飲不斲畜乎  
樊中神雖王不善也

達生達生之情者不務生之所無

以為達命之情者不務知之所無奈何養形必先之物  
物有餘而形不養者有之矣有生必先無離形形不離  
而生亡者有之矣生之來不能却其去不能止悲夫世  
之人以為養形足以存生而養形果不足以存生則世  
奚足為哉雖不足為而不可不為者其為不免矣夫欲  
免為形者莫如棄世棄世則無累無累則正平正平則  
與彼更生更生則幾矣事奚足棄而生奚足遺棄事則  
形不勞遺生則精不虧夫形全精復與天為一天地者

萬物之父母也合則成體散則成始形精不虧是謂能  
移精而又精反以相天 祝宗人立端以臨牢筭說彘  
曰汝奚惡死吾將三月撝汝十日戒三日齋藉白茅加  
汝肩尻乎雕俎之上則汝為之乎為彘謀曰不如食以  
糠糟而錯之牢筭之中自為謀則苟生有軒冕之尊死  
得於豚楯之上聚俸之中則為之為彘謀則去之自為  
謀則取之所異彘者何也 梓慶削木為鐻鐻成見者  
驚猶鬼神魯侯見而問焉曰子何術以為焉對曰臣工

人何術之有雖然有一焉臣將為錄未嘗敢以耗氣也  
必齋以靜心齊三日而不敢懷慶賞爵祿齊五日不敢  
懷非譽巧拙齊七日輒然忘吾有四枝形體也當是時  
也無公朝其巧專而外骨消然後入山林觀天性形軀  
至矣然後成見錄然後加手焉不然則已則以天合天  
器之所以疑神者其是與 有孫休者踵門而託子扁  
慶子曰休居鄉不見謂不脩臨難不見謂不勇然而田  
原不遇歲事君不遇世賓於鄉里逐於州部則胡罪乎



天哉休惡遇此命也扁子曰子獨不聞夫至人之自行  
邪忘其肝膽遺其耳目茫然彷徨乎塵垢之外逍遙乎  
無事之業是謂為而不恃長而不宰今汝飾知以驚愚  
脩身以明汙昭昭乎若揭日月而行也汝得全而形軀  
具而九竅無中道夭於聾盲跛蹇而比於人數亦幸矣  
又何暇乎天之怨哉子往矣孫子出扁子入坐有閒仰  
天而歎弟子問曰先生何為歎乎扁子曰向者休來吾  
告之以至人之德吾恐其驚而遂至於惑也弟子曰不

然孫子之所言是邪先生之所言非邪非固不能感是  
孫子所言非邪先生所言是邪彼固惑而來矣又奚罪  
焉扁子曰不然昔者有鳥止於魯郊魯君說之為具太  
牢以饗之奏九韶以樂之鳥乃始憂悲眩視不敢飲食  
此之謂以己養養鳥也若夫以鳥養養鳥者宜棲之深  
林浮之江湖食之以委蛇則平陸而已矣今休歎啓寡  
聞之民也吾告以至人之德譬之若載鼃以車馬樂鵠  
以鐘鼓也彼又惡能無驚乎哉

刻刻意尚行離世異

俗高論怨誹為亢而已矣此山谷之士非世之人枯槁  
赴淵者之所好也語仁義忠信恭儉推讓為脩而已矣  
此平世之士教誨之人遊居學者之所好也語大功立  
大名禮君臣正上下為治而已矣此朝廷之士尊主彊  
國之人致功并兼者之所好也就藪澤處閒曠釣魚閒  
處無為而已矣此江海之士避世之人閒暇者之所好  
也吹呶呼吸吐故納新熊經鳥申為壽而已矣此道引  
之士養形之人彭祖壽考者之所好也若夫不刻意而

高無仁義而脩無功名而治無江海而閒不道引而壽  
無不忘也無不有也澹然無極而衆美從之此天地之  
道聖人之德也故曰夫恬惔寂寞虛無無為此天地之  
平而道德之質也故曰聖人休休焉則平易矣平易則  
恬惔矣平易恬惔則憂患不能入邪氣不能襲故其德  
全而神不虧故曰聖人之生也天行其死也物化靜而  
與陰同德動而與陽同波不為福先不為禍始感而後  
應迫而後動不得已而後起去知與故循天之理故無

天災無物累無人非無鬼責其生若浮其死若休不思慮不豫謀光矣而不耀信矣而不期其寢不夢其覺無憂其神純粹其魄不罷虛無恬惓乃合天德故曰悲樂者德之邪喜怒者道之過好惡者德之失故心不憂樂德之至也一而不變靜之至也無所於忤虛之至也不與物交淡之至也無所於逆粹之至也故曰形勞而不休則弊精用而不已則勞勞則竭水之性不雜則清莫動則平鬱閉而不流亦不能清天德之象也故曰純粹

而不雜靜一而不變淡而無為動而以天行此養神之道也夫有干越之劍者柙而藏之不敢用也寶之至也精神四達並流無所不極上際於天下蟠於地化育萬物不可為象其名為同帝純素之道唯神是守守而勿失與神為一一之精通合於天倫野語有之曰衆人重利廉士重名賢士尚志聖人貴精故素也者謂其無所與雜也純也者謂其不虧其神也能體純素謂之真人

人閒世

匠石之齊至乎曲轅見櫟社樹其大蔽牛絜之

百圍其高臨山十仞而後有枝其可以為舟者旁千數  
觀者如市匠伯不顧遂行不輟弟子厭觀之走及匠石  
曰自吾執斧斤以隨夫子未嘗見材如此其美也先生  
不肯視行不輟何邪曰已矣勿言之矣散木也以為舟  
則沈以為棺槨則速腐以為器則速毀以為門戶則液  
槁以為柱則蠹是不材之木也無所可用故能若是之  
壽匠石歸櫟社見夢曰女將惡乎比予哉若將比予於  
文木邪夫柎梨橘柚果蓏之屬實熟則剝則辱大枝折

小枝泄此以其能苦其生者也故不終其天年而中道  
夭自掊擊於世俗者也物莫不若是且予求無所可用  
久矣幾死乃今得之為予大用使予也而有有用且得有  
此大也邪且也若與予也皆物也奈何哉其相物也而  
幾死之散人又惡知散木匠石覺而診其夢弟子曰趣  
取無用則為社何邪曰密若無言彼亦直寄焉以為不  
知已者詬厲也不為社者且幾有翦乎且也彼其所保  
與衆異而以義譽之不亦遠乎 南伯子綦遊乎商之



邱見大木焉有異結駟千乘隱將芘其所賴子綦曰此何木也哉此必有異材夫仰而視其細枝則拳曲而不可以為棟梁俯而視其大根則軸解而不可以為棺槨啞其葉則口爛而為傷嗅之則使人狂醒三日而不已子綦曰此果不材之木也以及於此其大也嗟乎神人以此不材宋有荆氏者宜楸柏桑其拱把而上者求狙猴之杙者斬之三圍四圍求高名之麗者斬之七圍八圍貴人富商之家求禪傍者斬之故未終其天年而中

道之夭於斧斤此材之患也故解之以牛之白顙者與豚之亢鼻者與人有痔病者不可以適河此皆巫祝以知之矣所以為不祥也此乃神人之所以為大祥也

支離叟者頤隱於齊肩高於頂會撮指天五管在上兩髀為脅挫鍼治繃足以餬口鼓篋播精足以食十人上徵武士則支離攘臂於其閒上有大役則支離以有常疾不受功上與病者粟則受三鍾與十束薪夫支離其形者猶足以養其身終其天年又況支離其德者乎

山莊子行於山中見大木枝葉盛茂伐木者止其旁而木  
不取也問其故曰無所可用莊子曰此木以不材得終  
其天年莊子出於山舍於故人之家故人喜命豎子殺  
鴈而烹之豎子請曰其一能鳴其一不能鳴請奚殺主  
人曰殺不能鳴者明日弟子問於莊子曰昨日山中之  
木以不材得終其天年今主人之鴈以不材死先生將  
何處莊子笑曰周將處夫材與不材之間材與不材之  
間似之而非也故未免乎累若夫乘道德而浮遊者則

不然無譽無訾一龍一蛇與時俱化而無肯專為一上  
一下以和為量浮遊乎萬物之祖物物而不物於物則  
胡可得而累邪此神農黃帝之法則也若夫萬物之情  
人倫之傳則不然合則離成則毀廉則挫尊則議有為  
則虧賢則謀不肖則欺胡可得而必乎哉悲夫弟子志  
之其唯道德之鄉乎 莊周遊乎雕陵之樊觀一異鵲  
自南方來者翼廣七尺目大運寸感周之穎而集於栗  
林莊周曰此何鳥哉翼殷不逝目大不覩蹇裳躩步執

彈而留之觀一蟬方得美蔭而忘其身螳螂執翳而搏之見得而忘其形異鵲從而利之見利而忘其真莊周怵然曰噫物固相累二類相召也捐彈而反走虞人逐而許之莊周反入三月不庭蘭且從而問之夫子何為頃閒甚不庭乎莊周曰吾守形而忘身觀於濁水而迷於清淵且吾聞諸夫子曰入其俗從其俗今吾遊於雕陵而忘吾身異鵲感吾顙遊於栗林而忘真栗林虞人以吾為戮吾所以不庭也

地天天地雖大其化均也萬

物雖多其治一也人率雖衆其主君也君原於德而成於天故曰玄古之君天下無為也天德而已矣以道觀言而天下之君正以道觀分而君臣之義明以道觀能而天下之官治以道汎觀而萬物之應備故通於天地者德也行於萬物者道也上治人者事也能有所藝者技也技兼於事事兼於義義兼於德德兼於道道兼於天故曰古之畜天下者無欲而天下足無為而萬物化淵靜而百姓定記曰通於一而萬事畢無心得而鬼神

服夫子曰夫道覆載萬物者也洋洋乎大哉君子不可以不刳心焉無為為之之謂天無為言之之謂德愛人利物之謂仁不同同之之謂大行不崖異之謂寬有萬不同之謂富故執德之謂紀德成之謂立循於道之謂備不以物挫志之謂完君子明於此十者則韜乎其事心之大也沛乎其為萬物逝也若然者藏金於山藏珠於淵不利貨財不近貴富不樂壽不哀夭不榮通不醜窮不拘一世之利以為己私分不以王天下為己處顯

顯則明萬物一府死生同狀夫子曰夫道淵乎其居也  
濇乎其清也金石不得無以鳴故金石有聲不考不鳴  
萬物孰能定之夫王德之人素逝而恥通於事立之本  
原而知通於神故其德廣其心之出有物採之故形非  
道不生生非德不明存形窮生立德明道非王德者邪  
蕩蕩乎忽然出勃然動而萬物從之乎此謂王德之人  
視乎冥冥聽乎無聲冥冥之中獨見曉焉無聲之中獨  
聞和焉故深之又深而能物焉神之又神而能精焉故



其與萬物接也至無而供其求時騁而要其宿大小長短脩遠泰初有無無有無名一之所起有一而未形物得以生謂之德未形者有分且然無閒謂之命留動而生物物成生理謂之形形體保神各有儀則謂之性性修反德德至同於初同乃虛虛乃大合喙鳴喙鳴合與天地為合其合緡緡若愚若昏是謂玄德同乎大順門無鬼與赤張滿稽觀於武王之師赤張滿稽曰不及有虞氏乎故離此患也門無鬼曰天下均治而有虞

氏治之邪其亂而後治之與赤張滿稽曰天下均治之  
為願而何計以有虞氏為有虞氏之藥瘍也禿而施髡  
病而求醫孝子操藥以脩慈父其色焦然聖人羞之至  
德之世不尚賢不使能上如標枝民如野鹿端正而不  
知以為義相愛而不知以為仁實而不知以為忠當而  
不知以為信蠢動而相使不以為賜是故行而無迹事  
而無傳孝子不諛其親忠臣不諂其君臣子之盛也親  
之所言而然所行而善則世俗謂之不肖子君之所言

而然所行而善則世俗謂之不肖臣而未知此其必然  
邪世俗之所謂然而然之所謂善而善之則不謂之道  
諛之人也然則俗故嚴於親而尊於君邪謂已道人則  
勃然作色謂已諛人則怫然作色而終身道人也終身  
諛人也合譬飾辭聚衆也是終始本末不相坐垂衣裳  
設采色動容貌以媚一世而不自謂道諛與夫人之為  
徒通是非而不自謂衆人愚之至也知其愚者非大愚  
也知其惑者非大惑也太惑者終身不解大愚者終身

不靈三人行而一人惑所適者猶可致也惑者少也二人惑則勞而不至惑者勝也而今也以天下惑予雖有祈嚮不可得也不亦悲乎大聲不入於里耳折揚皇穹則嗑然而笑是故高言不上於衆人之心至言不出俗言勝也以二缶鍾惑而所適不得矣而今也以天下惑予雖有祈嚮其庸可得邪知其不可得也而強之又一惑也故莫若釋之而不推不推誰其比憂厲之人夜半生其子遽取火而視之汲汲然唯恐其似己也 百年

之木破為犧樽青黃而文之其斷在溝中比犧樽於溝中之斷則美惡有閒矣其於失性一也跖與曾史行義有閒矣然其失性均也且夫失性有五一曰五色亂目使目不明二曰五聲亂耳使耳不聰三曰五臭薰鼻困懷中顙四曰五味濁口使口厲爽五曰趣舍滑心使性飛揚此五者皆生之害也而楊墨乃始離跖自以為得非吾所謂得也夫得者困可以為得乎則鳩鵲之在於籠也亦可以為得矣且夫趣舍聲色以柴其內皮弁鷩

冠搢笏紳脩以約其外內支盈於柴柵外重纒繳眈眈然在纒繳之中而自以為得則是罪人交臂歷指而虎豹在於囊檻亦可以為得矣

康桑  
楚

宇泰定者發乎天

光發乎天光者人見其人人有脩者乃今有恒有恒者人舍之天助之人之所舍謂之天民天之所助謂之天子學者學其所不能學也行者行其所不能行也辯者辯其所不能辯也知止乎其所不能知至矣若有不即  
是者天鈞敗之備物以將形藏不虞以生心散中以達

彼若是而萬惡至者皆天也而非人也不足以滑成不  
可內於靈臺靈臺者有持而不知其所持而不可持者  
也不見其誠已而發每發而不當業入而不舍每更為  
失為不善乎顯明之中者人得而誅之為不善乎幽閒  
之中者鬼得而誅之明乎人明乎鬼者然後能獨行券  
內者行乎無名券外者志乎期費行乎無名者唯庸有  
光志乎期費者唯費人也人見其跂猶之魁然與物窮  
者物入焉與物且者其身之不能容焉能容人不能容

人者無親無親者盡人兵莫憚于志鎮鄒為下寇莫大於陰陽無所逃於天地之間非陰陽賊之心則使之也道通其分也其成也毀也所惡乎分者其分也以備所以惡乎備者其有以備故出而不反見其鬼出而得是謂得死滅而有實鬼之一也以有形者象無形者而定矣出無本入無竅有實而無乎處有長而無乎本剽有所出而無竅者有實有實而無乎處者宇也有長而無本剽者宙也有乎生有乎死有乎出有乎入出而無



見其形是謂天門天門者無有也萬物出乎無有有不能以有為有必出乎無有而無有一無有聖人藏乎是古之人其知有所至矣惡乎至有以為未始有物者至矣盡矣弗可以加矣其次以為有物矣將以生為喪也以死為反也是以分己其次曰始無有既而有生生俄而死以無有為首以生為體以死為尻孰知有無死生之一守者吾與之為友是三者雖異公族也昭景也著戴也甲氏也著封也非一也有生黷也披然曰移是嘗

言移是非所言也雖然不可知者也臘者之有脆胾可散而不可散也觀室者周於寢廟又適其偃焉為是舉移是請嘗言移是是以生為本以知為師因以乘是非果有名實因以己為質使人以為己節因以死償節若然者以用為知以不用為愚以徹為名以窮為辱移是今之人也是蜩與學鳩同於同也踉市人之足則辭以放驚兄則以嫗大親則己矣故曰至禮有不人至義不物至知不謀至仁無親至信辟金徹志之勃解心之謬

去德之累達道之塞貴富顯嚴名利六者勃志也容動  
色理氣意六者謬心也惡欲喜怒哀樂六者累德也去  
就取與知能六者塞道也此四六者不盪胸中則正正  
則靜靜則明明則虛虛則無為而無不為也道者德之  
欽也生者德之光也性者生之質也性之動謂之為為  
之偽謂之失知者接也知者謨也知者之所不知猶睨  
也動以不得已之謂德動非無我之謂治名相反而實  
相順也羿工乎中微而拙乎使人無己譽聖人工乎天

而拙乎人夫工乎天而俟乎人者唯全人能之唯蟲能蟲唯蟲能天全人惡天惡人之天而況吾天乎人乎一雀適羿羿必得之威也以天下為之籠則雀無所逃是故湯以庖人籠伊尹秦穆公以五羊之皮籠百里奚是故非以其所好籠之而可得者無有也介者扞畫外非譽也胥靡登高而不懼遺死生也夫復謂不餽而忘人忘人因以為天人矣故敬之而不喜侮之而不怒者唯同乎天和者為然出怒不怒則怒出於不怒矣出為無

為則為出於無為矣欲靜則平氣欲神則順心有為也  
欲當則緣於不得已不得已之類聖人之道

德充  
符闡

跂支離無脤說衛靈公靈公說之而視全人其脰肩肩  
甕甕大癭說齊桓公桓公說之而視全人其脰肩肩故  
德有所長而形有所忘人不忘其所忘而忘其所不忘  
此謂誠忘故聖人有所遊而知為擘約為膠德為接工  
為商聖人不謀惡用知不斷惡用膠無喪惡用德不貨  
惡用商四者天鬻也天鬻也者天食也既受食於天又

惡用人有人之形無人之情有人之形故羣於人無人之情故是非不得於身眇乎小哉所以屬於人也瞽乎大哉獨成其天 惠子謂莊子曰人故無情乎莊子曰然惠子曰人而無情何以謂之人莊子曰道與之貌天與之形惡得不謂之人惠子曰既謂之人惡得無情莊子曰是非吾所謂情也吾所謂無情者言人之不以好惡內傷其身常因自然而不益生也惠子曰不益生何以有其身莊子曰道與之貌天與之形無以好惡內傷

其身今子外乎子之神勞乎子之精倚樹而吟據槁梧而瞑天選子之形子以堅白鳴

知北遊

天地有大美而

不言四時有明法而不議萬物有成理而不說聖人者原天地之美而達萬物之理是故至人無為大聖不作觀於天地之謂也今彼神明至精與彼百化物已死生方圓莫知其根也扁然而萬物自古以固存六合為巨未離其內秋豪為小待之成體天下莫不沉浮終身不故陰陽四時運行各得其所惛然若亡而存油然不形

而神萬物畜而不知此之謂本根可以觀於天矣 東  
郭子問於莊子曰所謂道惡乎在莊子曰無所不在東  
郭子曰期而後可莊子曰在螻蟻曰何其下邪曰在稊  
稗曰何其愈下邪曰在瓦甕曰何其愈甚邪曰在屎溺  
東郭子不應莊子曰夫子之問也固不及質正獲之問  
於監市履狶也每下愈況汝唯莫必無乎逃物至道若  
是大言亦然周徧咸三者異名同實其指一也嘗相與  
遊乎無何有之宮同合而論無所終窮乎嘗相與無為



乎澹而靜乎漠而清乎調而閒乎寥已吾志無往焉而  
不知其所至去而來不知其所止吾已往來焉而不知  
其所終彷徨乎馮閔大知入焉而不知其所窮物物者  
與物無際而物有際者所謂物際者也不際之際際之  
不際者也謂盈虛衰殺彼為盈虛非盈虛彼為衰殺非  
衰殺彼為本末非本末彼為積散非積散也

列御  
寇莊

子曰知道易勿言難知而不言所以之天也知而言之  
所以之人也古之人天而不人朱泚漫學屠龍於支離

益單千金之家三年技成而無所用其巧聖人以必不  
必故無兵衆人以不必必之故多兵順於兵故行有求  
兵恃之則亡小夫之知不離苞苴竿牘蔽精神乎蹇淺  
而欲兼濟道物太一形虛若是者迷惑于宇宙形累不  
知太初彼至人者歸精神乎無始而甘冥乎無何有之  
鄉水流乎無形發泄乎太清悲哉乎汝為知在豪毛而  
不知大寧 宋人有曹商者為宋王使秦其往也得車  
數乘王說之益車百乘反於宋見莊子曰夫處窮閭阨

巷困窘織屨槁項黃馘者商之所短也一悟萬乘之主  
而從車百乘者商之所長也莊子曰秦王有病召醫破  
癰潰痊者得車一乘舐痔者得車五乘所治愈下得車  
愈多子豈治其痔邪何得車之多也子行矣人有見  
宋王者錫車十乘以其十乘驕穉莊子莊子曰河上有  
家貧恃緯蕭而食者其子沒於淵得千金之珠其父謂  
其子曰取石來鍛之夫千金之珠必在九重之淵而驪  
龍領下子能得珠者必遭其睡也使驪龍而寤子尚奚

微之有哉今宋國之深非直九重之淵也宋王之猛非直驪龍也子能得車者必遭其睡也使宋王而寤子為壅粉矣

大宗師

知天之所為知人之所為者至矣知天

之所為者天而生也知人之所為者以其知之所知以養其知之所不知終其天年而不中道夭者是知之盛也雖然有患夫知有所待而後當其所待者特未定也庸詎知吾所謂天之非人乎所謂人之非天乎且有真人而後有真知何謂真人古之真人不逆寡不雄成不

暮士若然者過而弗悔當而不自得也若然者登高不  
慄入水不濡入火不熱是知之能登假於道也若此古  
之真人其寢不夢其覺無憂其食不甘其息深深真人  
之息以踵衆人之息以喉屈服者其嗑言若哇其嗜欲  
深者其天機淺古之真人不知說生不知惡死其出不  
訢其入不距儵然而往儵然而來而已矣不忘其所始  
不求其所終受而喜之忘而復之是之謂不以心捐道  
不以人助天是之謂真人若然者其心志其容寂其顙

頽淒然似秋煖然似春喜怒通四時與物有宜而莫知其極故聖人之用兵也亡國而不失人心利澤施乎萬世不為愛人故樂通物非聖人也有親非仁也天時非賢也利害不通非君子也行名失已非士也亡身不真非役人也若狐不偕務光伯夷叔齊箕子胥餘紀他申徒狄是役人之役適人之適而不自適其適者也古之真人其狀義而不朋若不足而不承與乎其觚而不堅也張乎其虛而不華也邴邴乎其似喜乎崔乎其不得

已乎滄乎進我色也與乎止我德也厲乎其似世乎  
馨乎其未可制也連乎其似好閉也悅乎忘其言也  
以刑為體以禮為翼以知為時以德為循以刑為體  
者綽乎其殺也以禮為翼者所以行於世也以知為  
時者不得已於事也以德為循者言其與有足者至  
於邱也而人真以為勤行者也故其好之一其弗好  
之一其不一也一其與天為徒其不一與人為徒天  
與人不相勝也是之為真人死生命也其有夜旦之  
常

天也人之有所不得與皆物之情也彼特以天為父而身猶愛之而況其卓乎人特以有君為愈乎已而身猶死之而況其真乎泉涸魚相與處於陸相啣以溼相濡以沫不如相忘於江湖而其譽堯而非桀也不如兩忘而化其道夫大塊載我以形勞我以生佚我以老息我以死故善吾生者乃所以善吾死也夫藏舟於壑藏山於澤謂之固矣然而夜半有力者負之而走昧者不知也藏小大有宜猶有所遯若夫藏天下於天下而不得



所邈是恒物之大情也特犯人之形而猶喜之若人之  
形者萬化而未始有極也其為樂可勝計邪故聖人將  
遊於物之所不得邈而皆存善天善老善始善終人猶  
效之又況萬物之所係而一化之所待乎夫道有情有  
信無為無形可傳而不可受可得而不可見自本自根  
未有天地自古以固存神鬼神帝生天生地在太極之  
先而不為高在六極之下而不為深先天地生而不為  
久長於上古而不老稀韋氏得之以挈天地伏戲得之

以襲氣母維斗得之終古不忒日月得之終古不息堪  
坏得之以襲崑崙馮夷得之以遊大川肩吾得之以處  
大山黃帝得之以登雲天顓頊得之以處玄宮禹強得  
之立乎北極西王母得之坐乎少廣莫知其始莫知其  
終彭祖得之上及有虞下及五伯傳說得之以相武丁  
奄有天下乘東維騎箕尾而比於列星 南伯子葵問  
乎女偶曰子之年長矣而色若孺子何也曰吾聞道矣  
南伯子葵曰道可得學邪曰惡惡可子非其人也夫卜

梁倚有聖人之才而無聖人之道我有聖人之道而無  
聖人之才吾欲以教之庶幾其果為聖人乎不然以聖  
人之道告聖人之才亦易矣吾猶守而告之參日而後  
能外天下已外天下矣吾又守之七日而後能外物已  
外物矣吾又守之九日而後能外生已外生矣而後能  
朝徹朝徹而後能見獨見獨而後能無古今無古今而  
後能入於不死不生殺生者不死生者不生其為物  
無不將也無不迎也無不毀也無不成也其名為櫻寧

櫻寧也者櫻而後成者也南伯子葵曰子獨惡乎聞之  
曰聞諸副墨之子副墨之子聞諸洛誦之孫洛誦之孫  
聞之瞻明瞻明聞之聶許聶許聞之需役需役聞之於  
謳於謳聞之玄冥玄冥聞之參寥參寥聞之疑始子  
祀子與子犁子來四人相與語曰孰能以無為首以生  
為脊以死為尻孰知死生存亡之一體者吾與之友矣  
四人相視而笑莫逆於心遂相與為友俄而子輿有病  
子祀往問之曰偉哉夫造物者將以子為此拘拘也曲

僂發背上有五管頤隱於齊肩高於頂句贅指天陰陽之氣有沴其心閒而無事跼蹐而鑑于井曰嗟乎夫造物者又將以予為此拘拘也子祀曰女惡之乎曰亡予何惡浸假而化予之左臂以為雞予因以求時夜浸假而化予之右臂以為彈予因以求鶚炙浸假而化予之尻以為輪以神為馬予因而乘之豈更駕哉且夫得者時也失者順也安時而處順哀樂不能入也此古之所謂縣解也而不能自解者物有結之且夫物不勝天久

矣吾又何惡焉俄而子來有病喘喘然將死其妻子環而泣之犁往問之曰叱避無怛化倚其戶與之語曰偉哉造化又將奚以汝為將奚以汝適以汝為鼠肝乎以汝為蟲臂乎子來曰父母於子東西南北唯命之從陰陽於人不翅於父母彼近吾死而我不聽我則悍矣彼何罪焉夫大塊載我以形勞我以生佚我以老息我以死故善吾生者乃所以善吾死也今大冶鑄金金踊躍曰我且必為鏌鋣大冶必以為不祥之金今一犯人之

形而曰人耳人耳夫造化者必以為不祥之人今一以  
天地為大鑪以造化為大冶惡乎往而不可哉成然寐  
遽然覺子輿與子桑友而霖雨十日子輿曰子桑殆  
病矣裹飯而往食之至子桑之門則若歌若哭鼓琴曰  
父邪母邪天乎人乎有不任其聲而趨舉其詩焉子輿  
入曰子之歌詩何故若是曰吾思夫使我至此極者而  
弗得也父母豈欲吾貧哉天無私覆地無私載天地豈  
私貧我哉求其為之者而不得也然而至此極者命也

夫

駢拇

駢拇枝指出乎性哉而侈於德附贅縣疣出乎

形哉而侈於性多方乎仁義而用之者列於五藏哉而非道德之正也是故駢於足者連無用之肉也枝於手者樹無用之指也多方駢枝於五藏之情者淫僻於仁義之行而多方於聰明之用也是故駢於明者亂五色淫文章青黃黼黻之煌煌非乎而離朱是已多於聰者亂五聲淫六律金石絲竹黃鍾大呂之聲非乎而師曠是已枝於仁者擢德塞性以收名聲使天下簞鼓以奉



不及之法非乎而曾史是已駢於辯者累瓦結繩竄白  
遊心於堅白同異之間而敝跬譽無用之言非乎而楊  
墨是已故此皆多駢旁枝之道非天下之至正也彼至  
正者不失其性命之情故合者不為駢而枝者不為跂  
長者不為有餘短者不為不足是故鳧脰雖短續之則  
憂鶴脰雖長斷之則悲故性長非所斷性短非所續無  
所去憂也意仁義其非人情乎彼仁義何其多憂也且  
夫駢於拇者決之則泣枝於手者斲之則啼二者或有

餘於數或不足於數其於憂一也今世之仁人蒿目而  
憂世之患不仁之人決性命之情而饕貴富故意仁義  
其非人情乎自三代以下者天下何其囂囂也且夫待  
鉤繩規矩而正者是削其性也待繩約膠漆而固者是  
侵其德也屈折禮樂啗俞仁義以慰天下之心者此失  
其常然也天下有常然常然者曲者不以鉤直者不以  
繩圓者不以規方者不以矩附離不以膠漆約束不以  
繆索故天下誘然皆生而不知其所以生同焉皆得而

不知其所以得故古今不二不可虧也則仁義又奚連  
連如膠漆纏索而遊乎道德之間為哉使天下惑也夫  
小惑易方大惑易性何以知其然邪自虞氏招仁義以  
撓天下也天下莫不奔命於仁義是非以仁義易其性  
與故嘗試論之自三代以下者天下莫不以物易其性  
矣小人則以身殉利士則以身殉名大夫則以身殉家  
聖人則以身殉天下故此數子者事業不同名聲異號  
其於傷性以身為殉一也臧與穀二人相與牧羊而俱

亡其羊問臧奚事則挾筴讀書問穀奚事則博塞以遊  
二人者事業不同其於亡羊均也伯夷死名於首陽之  
下盜跖死利於東陵之上二人者所死不同其於殘生  
傷性均也奚必伯夷之是而盜跖之非乎天下盡殉也  
彼其所殉仁義也則俗謂之君子其所殉貨財也則俗  
謂之小人其殉一也則有君子焉有小人焉若其殘生  
損性則盜跖亦伯夷已又惡取君子小人於其閒哉且  
夫屬其性乎仁義者雖通如曾史非吾所謂臧也屬其

性於五味雖通如俞兒非吾所謂臧也屬其性乎五聲  
雖通如師曠非吾所謂聰也屬其性乎五色雖通如離  
朱非吾所謂明也吾所謂臧非仁義之謂也臧於其德  
而已矣吾所謂聰者非所謂仁義之謂也任其性命之  
情而已矣吾所謂聰者非謂其聞彼也自聞而已矣吾  
所謂明者非謂其見彼也自見而已矣夫不自見而見  
彼不自得而得彼者是得人之得而不自得其得者也  
適人之適而不自適其適者也夫適人之適而不自適

其適雖盜跖與伯夷是同為淫僻也余愧乎道德是以  
上不敢為仁義之操而下不敢為淫僻之行也

徐無鬼

知士無思慮之變則不樂辯士無談說之序則不樂察  
士無凌詐之事則不樂皆囿於物者也招世之士興朝  
中民之士榮官筋力之士矜難勇敢之士奮患兵革之  
士樂戰枯槁之士宿名法律之士廣治禮樂之士敬容  
仁義之士貴際農夫無草萊之事則不比商賈無市井  
之事則不比庶人有旦暮之業則勸百工有器械之巧

則壯錢財不積則貪者憂權勢不尤則夸者悲勢物之  
徒樂變遭時有所用不能無為也此皆順比於歲不物  
於易者也馳其形性潛之萬物終身不反悲夫 莊子  
曰射者非前期而中謂之善射天下皆羿也可乎惠子  
曰可莊子曰天下非有公是也而各是其所是天下皆  
堯也可乎惠子曰可莊子曰然則儒墨楊秉四與夫子  
為五果孰是耶或者若魯遽者耶其弟子曰我得夫子  
之道矣吾能冬爨鼎而夏造冰矣魯遽曰是直以陽召

陽以陰召陰非吾所謂道也吾示子乎吾道於是乎為之調瑟廢一於堂廢一於室鼓宮宮動鼓角角動音律同矣夫或改調一弦於五音無當也鼓之二十五弦皆動未始異於聲而音之君已且若是者邪惠子曰今夫儒墨楊秉且方與我以辯相排以辭相鎮以聲而未始吾非也則奚若矣莊子曰齊人躋子於宋者其命閤也不以完其求鉏鍾也以束縛其求唐子也而未始出域有遺類矣夫楚人寄而躋閤者夜半於無人之時而與



舟人鬪未始離於岑而足以造於怨也 莊子送葬過

惠子之墓顧謂從者曰郢人堊慢其鼻端若蠅翼使匠  
石斲之匠石運斤成風聽而斲之盡堊而鼻不傷郢人  
立不失容宋元君聞之召匠石曰嘗試為寡人為之匠  
石曰臣則嘗能斲之雖然臣之質死久矣自夫子之死  
也吾無以為質矣吾無與言之矣 南伯子綦隱几而  
坐仰天而噓顏成子入見曰夫子物之尤也形固可使  
若槁骸心固可使若死灰乎曰吾嘗居山穴之中矣當

是時也田禾一覩我而齊國之衆三賀之我必先之彼  
故知之我必賣之彼故鬻之若我而不有之彼惡得而  
知之若我而不賣之彼惡得而鬻之嗟乎我悲人之自  
喪者吾又悲夫悲人者吾又悲夫悲人之悲者其後而  
日遠矣 子綦有八子陳諸前召九方歟曰為我相吾  
子孰為祥九方歟曰梱也為祥子綦瞿然喜曰奚若曰  
梱也將與國君同食以終其身子綦索然出涕曰吾子  
何為以至於此極也九方歟曰夫與國君同食澤及三

族而況於父母乎今夫子聞之而泣是禦福也子則祥  
矣父則不祥子綦曰歎汝何足以識之而相祥耶盡於  
酒肉入於口鼻矣而何足以知其所自來吾未嘗為牧  
而牂生於奧未嘗好田而鷄生於突若勿怪何邪吾所  
與吾子遊者遊於天地吾與之邀樂於天吾與之邀食  
於地吾不與之為事不與之為謀不與之為怪吾與之  
乘天地之誠而不以物與之相櫻吾與之一委蛇而不  
與之為事所宜今也然有世俗之償焉凡有怪徵者必

有怪行殆乎非我與吾子之罪幾天與之也吾是以泣也無幾何而使捆之於燕盜得之於道全而鬻之則難不若刖之則易於是刖而鬻之於齊適當渠公之街然身食肉而終有暖姝者有濡需者有卷婁者所謂暖姝者學一先生之言則暖暖姝姝而私自說也自以為足矣而未知未始有物也是以謂暖姝者也濡需者豕蟲是也擇疏鬣自以為廣宮大囿奎蹄曲隈乳間股脚自以為安室利處不知屠者之一旦鼓臂布草操煙火

而已與豕俱焦也此以域進此以域退此其所謂濡需者也卷婁者舜也羊肉不慕蟻蟻慕羊肉羊肉羶也舜有羶行百姓說之故三徙成都至鄧之虛而十有萬家堯聞舜之賢舉之童土之地曰冀得其來之澤舜舉乎童土之地年齒長矣聰明衰矣而不得休歸所謂卷婁者也是以神人惡衆至衆至則不比不比則不利也故無所甚親無所甚疎抱德煬和以順天下此謂真人於蟻棄知於魚得計於羊棄意以目視目以耳聽耳以心

復心若然者其平也繩其變也循古之真人以天待之  
不以人入天古之真人得之也生失之也死得之也死  
失之也生藥也其實量也桔梗也雞雁也豕零也是時  
為帝者也何可勝言句踐也以甲楯三千棲於會稽唯  
種也能知亡之所以存唯種也不知其身之所以愁故  
曰鵠目有所適鶴脰有所節解之也悲故曰風之過河  
也有損焉日之過河也有損焉請只風與日相與守河  
而河以為未始其櫻也恃源而往者也故水之守土也

審影之守人也審物之守物也審故目之於明也殆耳  
之於聰也殆心之於殞也殆凡能其於府也殆殆之成  
也不給改禍之長也茲萃其反也緣功其果也待久而  
人以為已寶不亦悲乎故有亡國戮民無已不知問是  
也故足之於地也踐雖踐恃其所不踞而後善博也人  
之知也少雖少恃其所不知而後知天之所謂也知大  
一知大陰知大目知大均知大方知大信知大定至矣  
大一通之大陰解之大目視之大均緣之大方體之大

信稽之大定持之盡有天猶有照冥有樞始有彼則其解之也似不解之者其知之也似不知之也不知而後知之其問之也不可以有崖而不可以無崖頡滑有實古今不代而不可以虧則可不謂有大揚摧乎闔不亦問是已奚惑然為以不惑解惑復於不惑是尚大不惑

則陽則陽遊於楚夷節言之於王王未之見夷節歸彭

陽見王果曰夫子何不譚我於王王果曰我不若公閱休彭陽曰公閱休奚為者耶曰冬則擲鼈于江夏則休



乎山樊有過而問者曰此予宅也夫夷節已不能而況我乎吾又不若夷節夫夷節之為人也無德而有知不自許以之神其交固顛冥乎富貴之地非相助以德相助消也夫凍者假衣於春暘者反冬乎冷風夫楚王之為人也形尊而嚴其於罪也無赦如虎非夫佞人正德其孰能撓焉故聖人其窮也使家人忘其貧其達也使王公忘爵祿而化卑其於物也與之為娛矣其於人也樂道之通而保已焉故或不言而飲人以和與人並立

而使人化父子之宜彼其乎歸居而一閒其所施其於人心者若是其遠也故曰待公閱休聖人達綢繆周盡一體矣而不知其然性也復命搖作而以天為師人則從而命之也憂乎知而所行恒無幾時其有止也若之何生而美者人與之鑑不告則不知其美於人也若知之若不知之若聞之若不聞之其可喜也終無已人之好之亦無已性也聖人之愛人也人與之名不告則不知其愛人也若知之若不知之若聞之若不聞之其愛

人也終無已人之安之亦無已性也舊國舊都望之暢然雖使邱陵草木之緝入之者十九猶之暢然況見見聞聞者也以十仞之臺縣衆聞者也冉相氏得其環中以隨成與物無終無始無幾無時日與物化者一不化者也闔嘗舍之夫師天而不得師天與物皆殉其以為事也若之何夫聖人未始有天未始有人未始有始未始有物與世偕行而不替所行之備而不洩其合之也若之何湯得其司御門尹登恒為之傅之從師而不囿

得其隨成為之司其名之名羸法得其兩見仲尼之盡  
慮為之傳之容成氏曰除日無歲無內無外 長梧封  
人問子牢曰君為政焉勿鹵莽治民焉勿滅裂昔子為  
禾耕而鹵莽之則其實亦鹵莽而報子芸而滅裂之其  
實亦滅裂而報子子來年變齊深其耕而熟穫之其禾  
繁以滋子終年厭飡莊子聞之曰今人之治其形理其  
心多有似封人之所謂遁其天離其性滅其情亡其神  
以衆為故鹵莽其性者欲惡之孽為性荏葦蒿蔕始萌

以扶吾形尋擢吾性竝潰漏發不擇所出漂疽疥癰內  
熱洩膏是也 少知問於大公調曰何謂邱里之言大  
公調曰邱里者合十姓百名而以為風俗也合異以為  
同散同以為異今指馬之百體而不得馬而馬係於前  
者立其百體而謂之馬也是故邱山積卑而為高江河  
合水而為大人合并而為公是以自外入者有主而  
不執由中出者有正而不距四時殊氣天不賜故歲成  
五官殊職君不私故國治文武大人不賜故德備萬物

殊理道不私故無名無名故無為而無不為時有  
終始世有變化禍福淳淳至有所拂者而有所宜自殞  
殊面有所正者有所差比於大澤百材皆度觀乎大山  
木石同壇此之謂邱里之言少知曰然則謂之道足乎  
大公調曰不然今計物之數不止於萬而期曰萬物者  
以數之多者號而讀之也是故天地者形之大者也陰  
陽者氣之大者也道者為之公因其大以號而讀之則  
可也已有之矣乃將得比哉則若以斯辯譬猶狗馬其

不及遠矣少知曰四方之內六合之裏萬物之所生惡起大公調曰陰陽相照相蓋相治四時相代相生相殺欲惡去就於是橋起雌雄片合於是庸有安危相易禍福相生緩急相摩聚散以成此名實之可紀精之可志也隨序之相理橋運之相使窮則反終則始此物之所言之所盡知之所至極物而已觀道之人不隨其所廢不原其所起此議之所止少知曰季真之莫為接子之或使二家之議孰正於其情孰徧於其理大公調曰

雞鳴狗吠是人之所知雖有大知不能以言讀其所自  
化又不能以意其所將為斯而析之精至於無倫大至  
於不可圍或之使莫之為未免於物而終以為過或使  
則實莫為則虛有名有實是物之居無名無實在物之  
虛可言可意言而愈疏未生不可忌已死不可徂死生  
非遠也理不可覩或之使莫之為疑之所假吾觀之本  
其徃無窮吾求之末其來無止無窮無止言之無也與  
物同理或使莫為言之本也與物終始道不可有有不



可無道之為名所假而行或使莫為在物一曲夫胡為  
於大方言而足則終日言而盡道言而不足則終日言  
而盡物道物之極言默不足以載非言非默議其有極

應帝  
王

天根遊於殷陽至蓼水之上適遭無名人而問  
焉曰請問為天下無名人曰去汝鄙人也何問之不預  
也予方將與造物者為人厭則又乘夫莽眇之鳥以出  
六極之外而遊無何有之鄉以處壑垠之野汝又何帛  
以治天下感予之心為又復問無名人曰汝遊心於淡

合氣於漠順物自然而無容私焉而天下治矣 無為  
名尸無為謀府無為事任無為知主體盡無窮而遊無  
朕盡其所受乎天而無見得亦虛而已至人之用心若  
鏡不將不逆應而不藏故能勝物而不傷南海之帝為  
儵北海之帝為忽中央之帝為渾沌儵與忽時相與遇  
於渾沌之地渾沌待之甚善儵與忽謀報渾沌之德曰  
人皆有七竅以視聽食息此獨無有嘗試鑿之日鑿一  
竅七日而渾沌死

運天其運乎地其處乎日月其爭

於所乎孰主張是孰綱維是孰居無事推而行是意者  
其有機緘而不得已邪意者其運轉而不能自止邪雲  
者為雨乎雨者為雲乎孰隆施是孰居無事淫樂而勸  
是風起北方一西一東有上彷徨孰噓吸是孰居無事  
而披拂是敢問何故坐咸裕曰來吾語女天有六極五  
常帝王順之則治逆之則凶九洛之事治成德備監照  
下土天下載之此謂上皇 商大宰蕩問仁於莊子莊  
子曰虎狼仁也曰何謂也莊子曰父子相親何為不仁

曰請問至仁莊子曰至仁無親大宰曰蕩聞之無親則  
不愛不愛則不孝謂至仁不孝可乎莊子曰不然夫至  
仁尚矣孝固不足以言之此非過孝之言也不及孝之  
言也夫南行者至於郢北面而不見冥山是何也則去  
之遠也故曰以敬孝易以愛孝難以愛孝易而忘親難  
忘親易使親忘我難使親忘我易兼忘天下難兼忘天  
下易使天下兼忘我難夫德遺堯舜而不為也利澤施  
於萬世天下莫知也豈直太息而言仁孝乎哉夫孝悌

仁義忠信貞廉此皆自勉以役其德者也不足多也故  
曰至貴國爵并焉至富國財并焉至願名譽并焉是以  
道不渝

馬蹄

可以踐霜雪毛可以禦風寒齟草飲

水翹足而陸此馬之真性也雖有義臺路寢無所用之  
及至伯樂曰我善治馬燒之剔之刻之錐之連之以羈  
馬編之以阜棧馬之死者十二三矣飢之渴之馳之驟  
之整之齊之前有櫛飾之患而後有鞭策之威而馬之  
死者已過半矣陶者曰我善治埴圓者中規方者中矩

匠人曰我善治木曲者中鉤直者應繩夫埴木之性豈欲中規矩鉤繩哉然且世世稱之曰伯樂善治馬而陶匠善治埴木此亦治天下者之過也吾意善治天下者不然彼民有常性織而衣耕而食是謂同德一而不黨命曰天放故至德之世其行填填其視顛顛當是時也山無蹊隧澤無舟梁萬物羣生連屬其鄉禽獸成羣草木遂長是故禽獸可係羈而遊鳥鵲之巢可攀援而窺夫至德之世同與禽獸居族與萬物並惡乎知君子小

人哉同乎無知其德不離同乎無欲是謂素樸素樸而  
民性得矣及至聖人蹙蹙為仁跽跂為義而天下始疑  
矣澶漫為樂摘僻為禮而天下始分矣故純樸不殘孰  
為犧樽白玉不毀孰為珪璋道德不廢安取仁義性情  
不離安用禮樂五色不亂孰為文采五聲不亂孰應六  
律夫殘樸以為器工匠之罪也毀道德以為仁義聖人  
之過也夫馬陸居則食草飲水喜則交頸相靡怒則分  
背相踉馬知已此矣夫加之以衡扼齊之以月題而馬

知介倪闔扼鷙曼詭銜竊轡故馬之知而能至盜者伯樂之罪也夫赫胥氏之時民居不知所為行不知所之含哺而熙鼓腹而遊民能以此美及至聖人屈折禮樂以匡天下之形縣跂仁義以慰天下之心而民乃始跂跂好知爭歸於利不可止也此亦聖人之過也

肱將  
篋

為肱篋探囊發匱之盜而為守備則必攝緘滕固局鍤此世俗之所謂知也然而巨盜至則負匱揭篋擔囊而趨唯恐緘滕局鍤之不固也然則鄉之所謂知者不乃



為大盜積者也故嘗試論之世俗所謂知者有不為大盜積者乎所謂聖者有不為大盜守者乎何以知其然邪昔者齊國鄰邑相望雞狗之音相聞罔罟之所布耒耨之所刺方二千餘里闔四竟之內所以立宗廟社稷治邑屋州閭鄉曲者曷嘗不法聖人哉然而田成子一旦殺齊君而盜其國所盜者豈獨其國邪并與其聖知之法而盜之故田成子有乎盜賊之名而身處堯舜之安小國不敢非大國不敢誅十二世有齊國則是不乃

竊齊國并與其聖知之法以守其盜賊之身乎嘗試論之世俗之所謂至知者有不為大盜積者乎所謂至聖者有不為大盜守者乎何以知其然邪昔者龍逢斬比干剖萇弘脗子胥靡故四子之賢而身不免乎戮故跖之徒問於跖曰盜亦有道乎跖曰何適而無有道耶夫妄意室中之藏聖也入先勇也出後義也知可否知也分均仁也五者不備而能成大盜者天下未之有也由是觀之善人不得聖人之道不立跖不得聖人之道不

行天下之善人少而不善人多則聖人之利天下也少而害天下也多故曰脣竭則齒寒魯酒薄而邯鄲圍聖人生而大盜起梃擊聖人縱舍盜賊而天下始治矣夫川竭而谷虛邱夷而淵實聖人已死則大盜不起天下平而無故矣聖人不死大盜不止雖重聖人而治天下則是重利盜跖也為之斗斛以量之則并與斗斛而竊之為之權衡以稱之則并與權衡而竊之為之符璽以信之則并與符璽而竊之為之仁義以矯之則并與仁

義而竊之何以知其然邪彼竊鉤者誅竊國者為諸侯諸侯之門而仁義存焉則是非竊仁義聖知邪故逐於大盜揭諸侯竊仁義并斗斛權衡符璽之利者雖有軒冕之賞弗能勸斧鉞之威弗能禁此重利盜跖而使不可禁者是乃聖人之過也故曰魚不可脫於淵國之利器不可以示人彼聖人者天下之利器也非所以明天下也故絕聖棄知大盜乃止摘玉毀珠小盜不起焚符破璽而民朴鄙倍斗折衡而民不爭殫殘天下之聖法

而民始可與論議擢亂六律鑠絕竽瑟塞瞽曠之耳而天下始人含其聰矣滅文章散五采膠離朱之目而天下始人含其明矣毀絕鉤繩而棄規矩擡工倕之指而天下始人有其巧矣故曰大巧若拙削曾史之行鉗楊墨之口攘棄仁義而天下之德始玄同矣彼人含其明則天下不鑠矣人含其聰則天下不累矣人含其知則天下不惑矣人含其德則天下不僻矣彼曾史楊墨師曠工倕離朱者皆外立其德而以燭亂天下者也法之

所無用也子獨不知至德之世乎昔者容成氏大庭氏  
伯皇氏中央氏栗陸氏驪畜氏軒轅氏赫胥氏尊盧氏  
祝融氏伏羲氏神農氏當是時也民結繩而用之甘其  
食美其服樂其俗安其居鄰國相望雞狗之音相聞民  
至老死而不相往來若此之時則至治已今遂至使民  
延頸舉踵曰某所有賢者贏糧而趣之則內棄其親而  
外去其主之事足跡接乎諸侯之境車軌結乎千里之  
外則是上好知之過也上誠好知而無道則天下大亂

矣何以知其然邪夫弓弩畢弋機變之知多則鳥亂於  
上矣鉤餌網罟罾笱之知多則魚亂於水矣削格羅落  
置罟之知多則獸亂於澤矣知詐漸毒頡滑堅白解垢  
同異之變多則俗惑於辯矣故天下每每大亂罪在於  
好知故天下皆知求其所不知而莫知求其所已知者  
皆知非其所不善而莫知非其所已善者是以大亂故  
上悖日月之明下燬山川之精中墮四時之施惴喪之  
蟲肖翹之物莫不失其性甚矣夫好知之亂天下也自

三代以下者是已舍夫種種之機而說夫役役之佞釋夫恬淡無為而說夫噶噶之意噶噶已亂天下矣

天下

天下之治方術者多矣皆以其有為不可加矣古之所謂道術者果惡乎在曰無乎不在曰神何由降明何由出聖有所生王有所成皆原於一不離於宗謂之天人不離於精謂之神人不離於真謂之至人以天為宗以德為本以道為門兆於變化謂之聖人以仁為恩以義為理以禮為行以樂為和薰然慈仁謂之君子以法為



分以名為表以參為驗以稽為決其數一二三四是也  
百官以此相齒以事相常以衣食為主蕃息畜藏老弱  
孤寡為意皆有以養民之理也古之人其備乎配神明  
醇天地育萬物和天下澤及百姓明於本數係於末度  
六通四辟小大精粗其運無乎不在其明而在數度者  
舊法世傳之史尚多有之其在於詩書禮樂者鄒魯之  
士搢紳先生多能明之詩以道志書以道事禮以道行  
樂以道和易以道陰陽春秋以道名分其數散於天下

而設於中國者百家之學時或稱而道之天下大亂賢  
聖不明道德不一天下多得一察焉以自好譬如耳目  
鼻口皆有所明不能相通猶百家衆技也皆有所長時  
有所用雖然不該不徧一曲之士也判天地之美析萬  
物之理察古人之全寡能備於天地之美稱神明之容  
是故內聖外王之道闇而不明鬱而不發天下之人各  
為其所欲焉以自為方悲夫百家往而不反必不合矣  
後世之學者不幸不見天地之純古人之大體道術將

為天下裂不侈於後世不靡於萬物不暉於數度以繩  
墨自矯而備世之急古之道術有在於是者墨翟禽滑  
釐聞其風而說之為之大過已之大順作為非樂命之  
曰節用生不歌死無服墨子汜愛兼利而非鬪其道不  
怒又好學而博不異不與先王同毀古之禮樂黃帝有  
咸池堯有大章舜有大韶禹有大夏湯有大濩文王有  
辟雍之樂武王周公作武古之喪禮貴賤有儀上下有  
等天子棺槨七重諸侯五重大夫三重士再重今墨子

獨生不歌死不服桐棺三寸而無槨以為法式以此教人恐不愛人以此自行固不愛己未敗墨子道雖然歌而非歌哭而非哭樂而非樂是果類乎其生也勤其死也薄其道大毅使人憂使人悲其行難為也恐其不可以為聖人之道反天下之心天下不堪墨子雖獨能任奈天下何離於天下其去王也遠矣墨子稱道曰昔者禹之湮洪水決江河而通四夷九州也名山三百支川三千小者無數禹親自操橐耜而九雜天下之川腴無

胼胝無毛沐甚風櫛疾雨置萬國禹大聖也而形勞天下也如此使後世之墨者多以裘褐為衣以跣蹻為服日夜不休以自苦為極曰不能如此非禹之道也不足謂墨相里勤之弟子五侯之徒南方之墨者苦獲已齒鄧陵子之屬俱誦墨經而倍譎不同相謂別墨以堅白同異之辯相訾以臆偶不忤之辭相應以巨子為聖人皆願為之尸冀得為其後世至今不決墨翟禽滑釐之意則是其行則非也將使後世之墨者必自苦以腓無

胼胝無毛相進而已矣亂之上也治之下也雖然墨子  
真天下之好也將求之不得也雖枯槁不舍也才士也  
夫不累於俗不飾於物不苟於人不忤於衆願天下之  
安寧以活民命人我之養畢足而止以此白心古之道  
術有在於是者宋鉞尹文聞其風而說之作為華山之  
冠以自表接萬物以別宥為始語心之容命之曰心之  
行以聊合驩以調海內請欲置之以為主見侮不辱救  
民之鬪禁攻寢兵救世之戰以此周行天下上說下教

雖天下不取強聒而不舍者也故曰上下見厭而強見也雖然其為人太多其自為太少曰請欲固置五升之飯足矣先生恐不得飽弟子雖飢不忘天下日夜不休曰我必得活哉圖傲乎救世之士哉曰君子不為苛察不以身假物以為無益於天下者用之不如已也以禁攻寢兵為外以情欲寡淺為內其小大精粗其行適至是而止公而不黨易而無私決然無主趣物而不兩不顧於慮不謀於知於物無擇與之俱徃古之道術有在

於是者彭蒙田駢慎到聞其風而說之齊萬物以為首  
曰天能覆之而不能載之地能載之而不能覆之大道  
能包之而不能辯之知萬物皆有所可有所不可故曰  
選則不偏教則不至道則無遺者矣是故慎到棄知去  
已而緣不得已泠汰於物以為道理曰知不知將薄知  
而後鄰傷之者也謏騾無任而笑天下之尚賢也縱脫  
無行而非天下之大聖推拍輓斷與物宛轉舍是與非  
苟可以免不師知慮不知前後魏然而已矣推而後行



曳而後往若飄風之還若羽之旋若磨石之隧全而無  
非動靜無過未嘗有罪是何故夫無知之物無建已之  
患無用知之累動靜不離於理是以終身無譽故曰至  
於若無知之物而已無用賢聖夫塊不失道豪傑相與  
笑之曰慎到之道非生人之行而至死人之理適得怪  
焉田駢亦然學於彭蒙得不教焉彭蒙之師曰古之道  
人至於莫之是莫之非而已矣其風窳然惡可而言常  
反人不見觀而不免於魴斷其所謂道非道而所言之

肆不免於非彭蒙田駢慎到不知道雖然槩乎皆嘗有聞者也以本為精以物為粗以有積為不足澹然獨與神明居古之道術有在於是者關尹老聃聞其風而說之建之以常無有主之以太一以濡弱謙下為表以空虛不毀萬物為實關尹曰在已無居形物自著其動若水其靜若鏡其應若響易乎若亡寂乎若清同焉者和得焉者失未嘗先人而常隨人老聃曰知其雄守其雌為天下谿知其白守其辱為天下谷人皆取先已獨取

後曰受天下之垢人皆取實已獨取虛無藏也故有餘  
歸然而有餘其行身也徐而不費無為也而笑巧人皆  
求福已獨曲全曰苟免於咎以深為根以約為紀曰堅  
則毀矣銳則挫矣常寬容於物不削於人可謂至極關  
尹老聃乎古之博大真人哉芴漠無形變化無常死與  
生與天地並與神明往與芒乎何之忽乎何適萬物畢  
羅莫足以歸古之道術有在於是者莊周聞其風而說  
之以謬悠之說荒唐之言無端崖之辭時恣縱而不儻

不以綺見之也以天下為沈濁不可與莊語以卮言為曼衍以重言為真以寓言為廣獨與天地精神往來而不敖倪於萬物不譴是非以與世俗處其書雖瓌瑋而連犴無傷也其辭雖參差而諷詭可觀彼其充實不可以已上與造物者遊而下與外死生無終始者為友其於本也弘大而辟深閔而肆其於宗也可謂稠適而上遂矣雖然其應於化而解於物也其理不竭其來不蛻世乎昧乎未之盡者惠施多方其書五車其道舛駁其

言也不中厯物之意曰至大無外謂之大一至小無內  
謂之小一無厚不可積也其大千里天與地卑山與澤  
平日方中方睨物方生方死大同而與小同異此之謂  
小同異萬物畢同畢異此之謂大同異南方無窮而有  
窮今日適越而昔來連環可解也我知天之中央燕之  
北越之南是也汜愛萬物天地一體也惠施以此為大  
觀於天下而曉辯者天下之辯者相與樂之卵有毛雞  
三足郢有天下犬可以為羊馬有卵丁子有尾火不熱

山出口輪不踉地目不見指不至至不絕龜長於蛇矩  
不方規不可以為圓鑿不圍枘飛鳥之景未嘗動也鏃  
矢之疾而有不行不止之時狗非犬黃馬驪牛三白狗  
黑孤駒未嘗有母一尺之捶日取其半萬世不竭辯者  
以此與惠施相應終身無窮桓團公孫龍辯者之徒飾  
人之心易人之意能勝人之口不能服人之心辯者之  
囿也惠施日以其知與人之辯特與天下之辯者為怪  
此其柢也然惠施之口談自以為最賢曰天地其壯乎

施存雄而無術南方有倚人焉曰黃繚問天地所以不  
墜不陷風雨雷霆之故惠施不辭而應不慮而對徧為  
萬物說說而不休多而無已猶以為寡益之以怪以反  
人為實而欲以勝人為名是以與衆不適也弱於德強  
於物其塗墮矣由天地之道觀惠施之能其猶一蠹一  
蚤之勞者也其於物也何庸夫充一尚可曰愈貴道幾  
矣惠施不能以此自寧散於萬物而不厭卒以善辯為  
名惜乎惠施之才駘蕩而不得逐萬物而不反是窮譽

以聲形與影競走也悲夫

○此莊生自序也諸篇多寓言而此獨為莊語泛論諸家

推隆道德然其極力摹擬曲盡諸子形貌末復綴以惠施仍是其滑稽本色莊子逸篇闕夾之隸與殷翼之

孫過氏之子三士相與謀致人於造物共之元天之上元天者其高四見列星空闊來風桐乳致巢此以其

能若其性者插桃枝於戶連灰其下童子入不畏而鬼畏之是鬼智不如童子也廉者不食不義之食不

噉不義之水紼謳所生必於斥苦庚市子肩之毀王也小巫見大巫拔茅而棄此其所以終身弗如

童子夜嘯鬼數若齒羊溝之難三歲為株相者視之則非良難也然數以勝人者以狸膏塗其頭豫樟初

生可抓而絕鵲上高城之堦而巢於高榆之顛城壞巢折陵風而起故君子之居世者得時則行義失時則

鵲起金鐵蒙以大縹載六驥之上則致千里青鸞愛子忘親聲氏之牛夜亡而遇夔止而問焉我有四



足動而不善子一足而超踊何以然夔曰以吾一足王  
於子矣市上之人有善戴尊者累十尊而行人有與  
之更者行道未半而以其尊顛亡羊而得牛斷指而  
得頭羌人死燭而揚其灰流脈並作則為驚怖陽  
氣獨上則為顛病以十鈞射者見天而不見雲以七  
鈞射者見雲而不見鶴以五鈞射者見鶴而不見雀  
函牛之鼎沸蟻不得措一足人而不學命之曰視皮  
學而不行命之曰輒囊秋禽之肥易牙和之非不美  
也彭祖以為傷壽故不食之易姓而王封於太山禪  
於梁父者七十有二代其有形兆垠堦勒石凡千八百  
餘處槐之生也入季春五日而兔目十日而鼠耳更  
旬而如規二旬而葉成廬敖見若士深目鳶背禮  
若亢鋸之柄○莊子書五十二篇今存者三  
十三篇耳北齊杜弼所注惠施篇今亦不見  
文王喜劒劍士夾門而客三千餘人日夜相擊於前死

傷者歲百餘人好之不厭如是三年國衰諸侯謀之太子惺患之募左右曰孰能說王之意止劔士者賜之千金左右曰莊子當能太子乃使人以千金奉莊子莊子弗受與使者俱往見太子曰太子何以教周賜周千金太子曰聞夫子明聖謹奉千金以幣從者夫子弗受惺尚何敢言莊子曰聞太子所欲用周者欲絕王之喜好也使臣上說大王而逆王意下不當太子則身刑而死周尚安所事金乎使臣上說大王下當太子趙國何求

而不得也太子曰然吾王所見唯劔士也莊子曰諾周  
善為劔太子曰然吾王所見劔士皆蓬頭突鬢垂冠曼  
胡之纓短後之衣瞋目而語難王乃說之今夫子必儒  
服而見王事必大逆莊子曰請治劔服治劔服三日乃  
見太子太子乃與見王王脫白刃待之莊子入殿門不  
趨見王不拜王曰子欲何以教寡人使太子先曰臣聞  
大王喜劔故以劔見王王曰子之劔何能禁制曰臣之  
劔十步一人千里不留行王大說之曰天下無敵矣莊

子曰夫為劒者示之以虛開之以利後之以發先之以至願得試之王曰夫子休就舍待命令設戲請夫子王乃校劒士七日死傷者六十餘人得五六人使奉劒於殿下乃召莊子王曰今日試使士敦劒莊子曰望之久矣王曰夫子所御杖長短何如曰臣之所奉皆可然臣有三劒唯王所用請先言而後試王曰願聞三劒曰有天子劒有諸侯劒有庶人劒王曰天子之劒何如曰天子之劒以燕谿石城為鋒齊岱為鐸晉魏為脊周宋為

鐔韓魏為夾包以四夷裹以四時繞以渤海帶以常山  
制以五行論以刑德開以陰陽持以春夏行以秋冬此  
劒直之無前舉之無上案之無下運之無旁上決浮雲  
下絕地紀此劒一用匡諸侯天下服矣此天子之劒也  
文王茫然自失曰諸侯之劒何如曰諸侯之劒以知勇  
士為鋒以清廉士為鏑以賢良士為脊以忠勝士為鐔  
以豪傑士為夾此劒直之亦無前舉之亦無上案之亦  
無下運之亦無旁上法圓天以順三光下法方地以順

四時中知民意以安四鄉此劒一用如雷霆之震也四封之內無不賓服而聽從君命者矣此諸侯之劒也王曰庶人之劒何如曰庶人之劒蓬頭突鬢垂冠曼胡之纓短後之衣瞋目而語難相擊於前上斬頸領下決肝肺此庶人之劒無異於鬪雞一旦命已絕矣無所用於國事今大王有天子之位而好庶人之劒臣竊為大王薄之王乃率而上殿宰人上食王三環之莊子曰大王安坐定氣劒事已畢奏矣於是文王不出宮三月劒士

皆服弊其處也

○語近國策非  
莊生本書也

史記楚威王聞莊周賢使使厚幣迎之許以為相莊周  
笑謂楚使者曰千金重利卿相尊位也子獨不見郊祭  
之犧牛乎養食之數歲衣以文繡以入太廟當是之時  
雖欲為孤豚豈可得乎子亟去無污我我寧游戲污瀆  
之中自快無為有國者所羈終身不仕以快吾志焉  
莊子莊子釣於濮水楚王使大夫二人往先焉曰願以  
境內累矣莊子持竿不顧曰吾聞楚有神龜死已三千

歲矣王巾笥而藏之廟堂之上此龜者寧其死為留骨  
而貴乎寧其生而曳尾於塗中乎二大夫曰寧生而曳  
尾於塗中莊子曰往矣吾將曳尾於塗中 或聘於莊

子莊子應其使曰子見夫犧牛乎衣以文繡食以芻菽

及其牽而入於太廟雖欲為孤犢其可得乎古今樂錄  
莊周者齊

人也隱於山岳晉王遣使齎金百鎰聘以相位周謝使  
者去引聲歌曰天地之道近在宵臆呼噲精神以養九  
德渴不求飲饑不索食避世守道志潔如玉卿相之位  
難可直當巖巖之石幽而清涼枕塊寢處樂在其央寒  
涼回固可以久長○ 莊子衣大布而補之正縻係履  
周蒙人屬宋不屬齊



而過魏王魏王曰何先生之憊邪莊子曰貧也非憊也  
士有道德不能行憊也衣弊履穿貧也非憊也此所謂  
非遭時也王獨不見夫騰猿乎其得栢梓豫章也攬蔓  
其枝而王長其閒雖羿逢蒙不能睥睨也及其得柘棘  
枳枸之閒也危行側視振動悼慄此筋骨非有加急而  
不柔也處勢不便未足以逞其能也今處昏上亂相之  
閒而欲無憊奚可得邪此比干之見剖心徵也夫 莊  
周家貧故行貸粟於監河侯監河侯曰諾我將得邑金

將貸子三百金可乎莊周怱然作色曰周昨來有中道而呼者周顧視車轍中有鮒魚焉周問之曰鮒魚來子何為者耶對曰我東海之波臣也君豈有斗升之水而活我哉周曰諾我且南遊吳越之王激西江之水而迎子可乎鮒魚怱然作色曰吾失我常與我無所處吾得斗升之水然活耳君乃言此曾不如早索我於枯魚之

肆

說苑莊周貧者往貸粟於魏文侯曰待吾邑粟之來而厭之周曰乃今者周之來見道旁牛蹄中有鮒魚

焉太息謂周曰我尚可活也周曰須我為汝南見楚王決江淮以溉汝鮒魚曰今吾命在盆甕之中耳乃為我

見楚王決江淮以溉我汝則求我枯魚之肆矣今周以貧故來貸粟而曰須我邑粟來也而賜臣即來亦求臣傭肆矣文侯於是乃發粟百鍾送之莊周之室

莊子將死弟子欲厚葬之莊

子曰吾以天地為棺槨日月為連璧星辰為珠璣萬物為齋送吾葬具豈不備邪何以加此弟子曰吾恐烏鳶之食夫子也莊子曰在上為烏鳶食在下為螻蟻食奪彼與此何其偏也以不平平其平也不平以不徵徵其徵也不徵明者唯為之使神者徵之夫明之不勝神也久矣而愚者恃其所見入於人其功外也不亦悲乎

新論

莊子病劇弟子對之泣應曰我今死則誰先更百年生則誰後必不得免何貪於須臾已上莊子



繹史卷一百十二下

欽定四庫全書

史部

續史卷一百十三至五

詳校官檢討臣羅國俊

編修臣裴謙覆勘

覆校官博士臣劉光第

校對官中書臣田尹衡

謄錄監生臣沈建棟

欽定四庫全書

釋史卷一百十三

靈壁縣知縣馬驕撰

扁鵲文摯醫術

史記扁鵲者勃海郡鄭人也姓秦氏名越人少時為人舍長舍客長桑君過扁鵲獨竒之常謹遇之長桑君亦知扁鵲非常人也出入十餘年乃呼扁鵲私坐閒與語曰我有禁方年老欲傳與公公母泄扁鵲曰敬諾乃出其懷中藥予扁鵲飲是以上池之水三十日當知物矣

乃悉取其禁方書盡與扁鵲忽然不見殆非人也扁鵲以其言飲藥三十日視見垣一方人以此視病盡見五藏癥結特以診脈為名耳為醫或在齊或在趙在趙者名扁鵲其後扁鵲過虢虢太子死扁鵲至虢宮門下問中庶子喜方者曰太子何病國中治穰過於衆事中庶子曰太子病血氣不時交錯而不得泄暴發於外則為中害精神不能止邪氣邪氣畜積而不得泄是以陽緩而陰急故暴蹙而死扁鵲曰其死何如時曰雞鳴至今

曰收乎曰未也其死未能半日也言臣齊勃海秦越人也家在於鄭未嘗得望精光侍謁於前也聞太子不幸而死臣能生之中庶子曰先生得無誕之乎何以言太子可生也臣聞上古之時醫有俞跗治病不以湯液醪灑鑱石橋引案杌毒熨一撥見病之應因五藏之輸乃割皮解肌訣脈結筋搦髓腦揲荒爪幕瀦浣腸胃漱滌五藏練精易形先生之方能若是則太子可生也不能若是而欲生之曾不可以告咳嬰之兒終日扁鵲仰天



歎曰夫子之為方也若以管窺天以郄視文越人之為方也不待切脈望色聽聲寫形言病之所在聞病之陽論得其陰聞病之陰論得其陽病應見於大表不出千里決者至衆不可曲止也子以吾言為不誠試入診太子當聞其耳鳴而鼻張循其兩股以至於陰當尚溫也中庶子聞扁鵲言目眩然而不瞋舌橋然而不下乃以扁鵲言入報虢君虢君聞之大驚出見扁鵲於中闕曰竊聞高義之日久矣然未嘗得拜謁於前也先生過小

國幸而舉之偏國寡臣幸甚有先生則活無先生則棄  
捐填溝壑長終而不得反言未卒因噓唏服臆魂精泄  
橫流涕長潛忽忽承映悲不能自止容貌變更扁鵲曰  
若太子病所謂尸蹯者也夫以陽入陰中動胃繢緣中  
經維絡別下於三焦膀胱是以陽脈下遂陰脈上爭會  
氣閉而不通陰上而陽內行下內鼓而不起上外絕而  
不為使上有絕陽之絡下有破陰之紐破陰絕陽之色  
已廢脈亂故形靜如死狀太子未死也夫以陽入陰支

蘭藏者生以陰入陽支蘭藏者死凡此數事皆五藏廢中之時暴作也良工取之拙者疑殆扁鵲乃使弟子子陽厲鍼砥石以取外三陽五會有間太子蘇乃使子豹為五分之熨以八減之齊和煮之以更熨兩脇下太子起坐更適陰陽但服湯二旬而復故故天下盡以扁鵲為能生死人扁鵲曰越人非能生死人也此自當生者越人能使之起耳

說苑扁鵲過趙趙王太子暴疾而死鵲造宮門曰吾聞

國中卒有壤土之事得無有急乎中庶子之好方者應之曰然王太子暴疾而死扁鵲曰入言鄭醫秦越人能活太子中庶子難之曰吾聞上古之為醫者曰苗父苗父之為醫也以管為席以芻為狗北面而祝發十言耳請扶而來者舉而來者皆平復如故子之方能如此乎扁鵲曰不能又曰吾聞中古之為醫者曰俞柎俞柎之為醫也搦腦髓束盲莫炊灼九竅而定經絡死人復為生人故曰俞柎子之方能若是乎扁鵲曰不能中庶子

曰子之方如此譬若以管窺天以錐刺地所窺者甚大所見者甚小釣若子之方豈足以變駭童子哉扁鵲曰不然物故有昧掃而中蛟頭掩目而別白黑者太子之疾所謂尸厥者也以為不然入診之太子股陰當濕耳中焦焦如有嘯者聲然者皆可治也中庶子入報趙王趙王跣而趨出門曰先生遠辱幸臨寡人先生幸而有之則糞土之息得蒙天履地而長為人矣先生不有之則先犬馬填溝壑矣言未已涕泣沾襟扁鵲遂為診之

先造軒光之竈八成之湯砥針礪石取三陽五輸子容  
禱藥子明吹耳陽儀反神子越扶形子游矯摩太子遂  
得復生天下聞之皆曰扁鵲能生死人鵲辭曰子非能  
生死人也特使夫當生者活耳夫死者猶不可藥而生  
也悲夫亂君之治不可藥而息也詩曰多將熇熇不可

救藥甚之之辭也

○叙致各異不妨並  
美韓詩亦作號世子

史記扁鵲過齊齊桓侯客之入朝見曰君有疾在腠理  
不治將深桓侯曰寡人無疾扁鵲出桓侯謂左右曰醫

之好利也欲以不疾者為功後五日扁鵲復見曰君有疾在血脈不治恐深桓侯曰寡人無疾扁鵲出桓侯不說後五日扁鵲復見曰君有疾在腸胃間不治將深桓侯不應扁鵲出桓侯不說後五日扁鵲復見望見桓侯而退走桓侯使人問其故扁鵲曰疾之居腠理也湯熨之所及也在血脈鍼石之所及也其在腸胃酒醪之所及也其在骨髓雖司命無柰之何今在骨髓臣是以無請也後五日桓侯體病使人召扁鵲扁鵲已逃去桓侯

遂死使聖人預知微能使良醫得蚤從事則疾可已身  
可活也人之所病病疾多而醫之所病病道少故病有  
六不治驕恣不論於理一不治也輕身重財二不治也  
衣食不能適三不治也陰陽并藏氣不定四不治也形  
羸不能服藥五不治也信巫不信醫六不治也有此一  
者則重難治也

新語扁鵲居宋得罪於宋君出亡之衛衛人有病將死  
者扁鵲至其家欲為治之病者之父謂扁鵲曰吾子病



其篤將為迎良醫治非子所能治也退而不用乃使靈巫求福請命對扁鵲而呪病者卒死靈巫不能治也夫扁鵲天下之良醫而不能與靈巫爭用者知與不知也故事求遠而失迎廣藏而狹棄斯之謂也

列子魯公扈趙齊嬰二人有疾同請扁鵲求治扁鵲治之既同愈謂公扈齊嬰曰汝曩之所疾自外而干府藏者固藥石之所已今有偕生之疾與體偕長今為汝攻之何如二人曰願先聞其驗扁鵲謂公扈曰汝志強而

氣弱故足於謀而寡於斷齊嬰志弱而氣強故少於慮而傷於專若換汝之心則均於善矣扁鵲遂飲二人毒酒迷死三日剖胸探心易而置之投以神藥既悟如初二人辭歸於是公扈反齊嬰之室而有其妻子妻子弗識齊嬰亦反公扈之室有其妻子妻子亦弗識二室因相與訟求辯於扁鵲扁鵲辯其所由訟乃已

鵲冠子魏文侯問扁鵲曰子昆弟三人其孰最善為醫扁鵲曰長兄最善中兄次之扁鵲最為下魏文侯曰可

得聞邪扁鵲曰長兄於病視神未有形而除之故名不出於家中兄治病其在毫毛故名不出於閭若扁鵲者鑱血脉投毒藥剖肌膚間而名出聞於諸侯魏文侯曰善

戰國策醫扁鵲見秦武王武王示之病扁鵲請除左右曰君之病在耳之前目之下除之未必已也將使耳不聰目不明君以告扁鵲扁鵲怒而投其石曰君與知之者謀之而與不知者敗之使此知秦國之政也則君一

舉而亡國矣

史記扁鵲名聞天下過邯鄲聞貴婦人即為帶下醫過  
雒陽聞周人愛老人即為耳目痺醫來入咸陽聞秦人  
愛小兒即為小兒醫隨俗為變秦太醫令李醯自知伎  
不如扁鵲也使人刺殺之至今天下言脈者由扁鵲也

法言扁鵲盧人也而醫多虛漢  
書扁鵲內經九卷外經十三卷

列子龍叔謂文摯曰子之術微矣吾有疾子能已乎文  
摯曰唯命所聽然先言子所病之證龍叔曰吾鄉譽不

以為榮國毀不以為辱得而不喜失而弗憂視生如死  
視富如貧視人如豕視吾如人處吾之家如逆旅之舍  
觀吾之鄉如戎蠻之國凡此衆疾爵賞不能勸刑罰不  
能威盛衰利害不能易哀樂不能移固不可事國君交  
親友御妻子制僕隸此奚疾哉奚方能已之乎文摯乃  
命龍叔背明而立文摯自後向明而望之既而曰嘻吾  
見子之心矣方寸之地虛矣幾聖人也子心六孔流通  
一孔不達今以聖智為疾者或由此乎非吾淺術所能

已也

呂氏春秋齊王疾瘡使人之宋迎文摯文摯至視王之疾謂太子曰王之疾必可已也雖然王之疾已則必殺摯也太子曰何故文摯對曰非怒王則疾不可治怒王則摯必死太子頓首彊請曰苟已王之疾臣與臣之母以死爭之於王王必幸臣與臣之母願先生之勿患也文摯曰諾請以死為王與太子期而將往不當者三齊王固已怒矣文摯至不解屨登牀履王衣問王之疾王

怒而不與言文摯因出辭以重怒王王叱而起疾乃遂  
已王大怒不說將生烹文摯太子與王后急爭之而不  
能得果以鼎生烹文摯爨之三日三夜顏色不變文摯  
曰誠欲殺臣則胡不覆之以絕陰陽之氣王使覆之文  
摯乃死夫忠於治世易忠於濁世難文摯非不知活王  
之疾而身獲死也為太子行難以成其義也

繹史卷一百十三